


SSH
Current
Shelves
DU
740
A2
W3
v. 1624

Wantok
SSH Current Shelves
UC San Diego
Received on: 09-20-05



WAN TOK




OCEAN BLUE

Tuna in oil
Rait teist
yah!



Wan Wik, Septemba 1 - 7, 2005 NAMBA 1624

Niuspepa bilong yumi ol PNG stret! K1.00 long Mosbi tasol - Ausait Mosbi K1.30



Lukim insait:

- **NOGAT BANIS BILONG OL LIDA NOGUT - PES 3**
- **REN BAGARAPIM LAE - PES 6**

PNG KALA STRET: PNG bai amamasim tripela ten (30) krismas Independens na ol dispela yangpela i redim bilas bilong ol pinis. (lephan i go long rait) Angela Jimmy, Nancy Del, Tavita Diri, Thomas Del na Peter Jimmy Nwerim ol klos ol mama bilong ol, Anna Jimmy na Jennifer Binabe i samapim.

LIDA ASUA

Neville Choi i raitim

OMBUDSMAN Komisin i salim Gavana bilong Madang, James Yali long han

bilong Pablik Prosekyuta long kotim em aninit long wanpela lidasip traibunel. Komisin i lusim Mista Yali long han bilong Pablik Prosekyuta bihain long ol i mekim

wok painimaut long ol sut toktok olsem em i asua long stretpela pasin bilong lida.

I go moa long pes 2

Hepi 30 Indipendens
PNG i kam long

WANTOK



RELIABLE

PowerMate PETROL GENSETS

Available in different sizes to suit your application.
Feature: Circuit Breaker, Battery Charger, Volt Meter & Long Run Tank

Model: 5GF
Code: 137964
5kva
K 2,965

Model: 3GF
Code: 137960
3kva
K 2,295

Model: 2GF
Code: 137958
2kva
K 1,295

FATHER'S DAY GIFT IDEAS!
SUNDAY SEPTEMBER 4TH

ISO 9002
SGS

FREE 16W FLUORO & POWERBOARD
FREE CHEWMAN

with every purchase of a Powermate Petrol Genset!

Brian Bell Shop with a friend

POWERCENTRE 325 8066 BOROKO 325 5411 HCC GORDONS 325 8469 HCC LAE 472 3200 TOP TOWN 479 1918 GOROKA 732 1622 MT HAGEN 542 1999 KOKOPO 982 9027 MADANG 852 1899

Ripot kamaut long hevi agensim ol pikinini

Neville Choi i raitim

WANPELA non gavman ogenaisesen (NGO) Human Raits Wats i autim tete wanpela ripot i lukluk long ol hevi ol pikinini i save karim long han bilong polis insait long kantri.

Dispela ripot i singaut long Papua Niugini gavman long stopim ol polis long bagarapim ol pikinini.

Dispela ripot i gat 124 pes long en na i sut long ol hevi i save painim ol pikinini insait long

PNG taim ol i go kamap long han bilong ol polisman.

Meri husat i raitim dispela ripot Zama Coursen-Neff em i wanpela sinisa risetsa bilong Pikinini Raits Diviser bilong Human Raits Wats.

Human Raits Wats em i wanpela intansenel ogenaisesen we i save wok long strongim ol raits bilong ol pikinini.

Dispela 124 pes ripot i givim bikipela stori nogut tru long ol kain kain pasin nogut ol polis-

man i save mekim long ol pikinini taim ol i holim pasim ol long brukim lo.

Mis Coursen-Neff i tok as tingting bilong dispela ripot em long singaut long Papua Niugini gavman long:

- Daunim polis vailens o pasin nogut;
- Daunim, holim na sasim ol man nogut insait long polis fos; na
- Sanapim wanpela indipenden opis long was long ol samting polis i save mekim agensim ol pikinini.

Lida asua

... i kam long Pes 1

Wok painimaut i bin kamap bihain long polis i bin holim Mista Yali na Madang Distrik Kot i bin painim olsem em i bin asua taim em i paitim Distrik Etministreta bilong Madang, George Chapok. Narapela sas em Mista Yali i bin rausim Presiden bilong Ambenob Lokol Level Gavman taim em i no kisim tok orait long mekim. Ombudsman Komisn i tok ol dispela hevi bilong Mista Yali i bin kisim bikipela toktok insait long nius midia na dispela i bin bagarapim sindaun bilong ol pablik seven insait long provins.

Komisn i tok ol i bin givim sans long Mista Yali long bekim olgeta dispela sas. Em i bin givim bekim, tasol Komisn i go het yet long painim olsem Mista Yali i bin asua na em i no bihainim stretpela pasin bilong lida.

Komisn i tok Mista Yali i brukim Seksen 27(1) na 27(2) bilong Mama Lo. Seksen 27(1) bilong Mama Lo i tok olsem lida i mas bihainim stretpela pasin long pablik na pravit laip bilong em yet we em i noken:

- Kamap long mak we em i ken bagarapim wok o kirapim paul tingting long wok bilong em; o
- Daunim opis o posisen bilong em; o
- Larim pablik sanap na pasin bilong em i kisim nem nogut; o
- Daunim ona na bilip long

Gavman bilong Papua Niugini. Seksen 27(2) bilong Mama Lo i tok olsem husat man i stap aninit long lukaut bilong Lidasip Kod i noken mekim wok we i ken kirapim paul tingting long pablik long kain wok em i mekim.

"Long lukluk bilong Komisn, pasin Mista Yali i mekim i no stret na bihainim pasin bilong wanpela nesanel lida na i bagarapim nesanel bilip na gutpela pasin. Pasin bilong em i ken daunim bilip ol pipel i gat long em," Ombudsman Komisina Peter Masi i tok. Em i tok Pablik Prosekyuta nau i gat rait long sasim Mista Yali aninit long Lidasip Kod long em i no bihainim gut wok long opis bilong em.

Nu Silan opim nupela haus karim

Pater Janusz Skotniczny SVD

GAVMAN bilong kantri Nu Silan i opim nupela mama wod insait long wanpela liklik ples insait long Is Sepik provins.

Dispela nupela mama wod i stap long Kunjingini Helt Sub-Senta insait long Wosera Distrik.

Mande long dispela wik i lukim Hai Komisina bilong Nu Silan, Laurie Markes i opim dispela nupela haus karim.

Long toktok bilong em, Mista Markes i tok Papua Niugini em i wanpela bikipela poroman bilong Nu Silan. Em i pren bilong bipo tru na i kam inap long nau. Olsem na poroman i helpim poroman em i gutpela pasin.

Stat long moning tru, Katolik Misin long Kunjingini i bin pulap tru long ol manmeri.

Samting olsem 5000 pipel i bin bung long soim tenkyu long pipel bilong Nu Silan na Save the Children Fund (SCF) na Katolik Helt Sevises bilong Wewak Daiosis na ol Marasin Meri (Village Health Volunteers) long bringim dispela nupela helpim.



NUPELA HAUS KARIM: Hai Komisina bilong Nu Silan, Laurie Markes i raun lukim nupela haus karim.

Ol pipel i luksave olsem wok bung wantaim bilong planti ol pipel na organaisesen i mekim samting i kamap.

Sister Celine Yakasere, Helt Sekreteri bilong Wewak Diocese i amamas long dispela nupela haus karim em bikipela helpim bilong ol mama

bilong Wosera Distrik. Na tu em i helpim bilong inapim bikipela plen bilong Nesanel Helt Dipatmen long lukautim ol mama na pikinini.

Nupela haus karim em wanpela liklik hap bilong bikipela helt projek we SCF na Gavman bilong Nu

Silan i laik bringim long Is Sepik Provins.

Bill Humphrey, SCF Projek Menesa insait long provins i tok promis long harim wari bilong ol pipel na ol helt woka na go het wantaim dispela projek. Em i gutpela mak.

Giaman pasin kamap ples klia

MOA long 100 papa graun long wanpela ples long Nu Ailan provins i bin kirap nogut taim ol i harim stori bilong ol wok giaman long rejistaim papagraun kampani bilong ol.

Ol papa graun bilong Sentrel Nu Ailan Timba Risos Permit i bin kirap nogut tru taim Gino Tabakase, wanpela as ples man yet i tokaut olsem em i bin wok wantaim wanpela arapela man long raitim gia-

man han mak bilong tupela papa graun long ol pepa bilong rejistaim ol dairekta long bod bilong Basoma Holdings.

Basoma Holdings em i wanpela papa graun kampani bilong ol pipel bilong Sentrel Nu Ailan.

Bikipela kros pait i bin kamap bihain long wok loging long ples bilong ol i bin pinis nating taim Nesanel Kot i bin stopim wok.

Wok i bin pinis bihain long i gat kros long husat tru em i siaman bilong Basoma Holdings.

Man husat i bin go pas long mekim dispela hait wok giaman i bin ronawe lusim Nu Ailan na polis i wok long painim em yet.

Ol papa graun bilong Basoma i wok long singaut yet long dispela man long soim pes na tok klia long ai bilong ol yet long wanem samting em i mekim.

Mista Tabakase i tokim ol papa-graun olsem em i bin bihainim tok bilong wanpela arapela man, Greg Tabareng, husat i wok wantaim tupela loging kampani.

Tabakase i tokim ol papa graun olsem em i bin harim tok bilong Tabareng tasol long giaman na sainim han mak bilong tupela arapela papa graun.



Lida nogut i noken

i gat banis

Neville Choi i raitim

OL LIDA husat i no mekim stret wok bilong lida i noken i gat banis long mekimsave aninit long mama lo bilong Papua Niugini, na ol arapela lida insait long Nesenel Palamen i noken sapotim singaut long senisim mama lo.

Dispela em singaut i kam long Katolik As Bisop bilong Papua Niugini, Sir Brian Barnes.

Long redio program bilong em i save kamap long Katolik Redio Netwok, Sir Brian i mekim strongpela tok-tok agensim singaut bilong wanpela memba bilong palamen long senisim mama lo bilong

kantri bai ol lida i asua inap long kisim malolo long mekimsave.


"Dispela memba i laik senisim wanpela hap bilong mama lo i sut long ol lida. Tingting bilong man ya i olsem. I gat Lidasip Kod na Lidasip Traibunel o kot bilong ol lida. Em i tok olsem i orait long gavman i rausim ol lida, tasol ol memba bilong palamen, maski. Kain olsem bai i gat narapela lo bilong ol memba na narapela lo bilong ol manmeri. Man, em wanem kain tingting ya?" As Bisop Brian i tok.

Em i autim tingting na givim strongpela tok lukaut olsem sapos Palamen i luksave long

askim bilong dispela lida, bai i nogat kot i ken rausim ol lida long wok na ol bai go het long mekim pasin nogut yet.

"Wanem, kot i no inap rausim ol? Bai lidasip traibunel i lukluk long ol wok bilong ol na painimaut olsem ol i kranki na painim ol i rong pinis, na larim ol tasol? Man, bai ol i bikhet moa yet ya. Na long wanem as? Long wanem as na ol bai mekim olsem? Dispela memba i no tok long wanpela gutpela as long senisim konstitusen long ol lida. Em i tok em i orait long ol lida i brukim lo."

As Bisop Sir Brian i tok nau yet ol lida i mekim paul pasin i save risain o lusim wok taim



As Bisop Brian Barnes: Lo bilong olgeta manmeri

ol i save olsem ol bai go sanap long lidasip traibunel.

Em i singaut long ol memba bilong palamen long noken harim dispela toktok taim em i kamap long ol long paitim toktok long en.

"Ol i mas tingting gut tru ya, na rausim dispela samting. Long wanem dispela papa bilong dispela toktok ya we ol lida i ken larim

dispela.

Dispela memba ating i nogat sem bilong em. Nogat tru ya," em i tok.

As Bisop Sir Brian i singaut tu long ol pipel long luksave long husat memba i wok long sapotim dispela toktok na wetim ileksen long 2007 long rausim ol long wok lida.

Lukim Komentri pes 15



WANEM taim bai ol lida i luksave olsem em bai hat tru long senisim mama lo bilong kantri long haitim ol yet? Dispela kain pasin tasol na kain kain bikpela hevi i save painim ol liklik manmeri bilong yumi.

I GAT ol wan wan gutpela lida i stap husat i wok long mekim wok bilong strongim ol pipel bilong yumi. Bipo i bin gat taim we ol pipel i no bingat bilip long ol lida bilong yumi. Ol dispela gutpela lida nau i wok long strongim bek nem bilong lida. Tasol long traime na senisim mama lo bilong kantri long banisim ol yet long mekim save em wanpela kranki tingting tru.

LUKSARE i mas go long Ombudsman Komisn long strongim wok bilong lida. Narapela gavana ya nau bai go sanap long kot bilong ol lida. Tasol long wankain taim, ol pipel i laik save, olsem wanem long ol lida insait long ol praivet bisnis? Planti kain kain sut toktok i save go kam long ol bikman insait long praivet bisnis. Bai i gat rot long holim pasim ol tu o nogat?

BIKPELA ren na taitwara i bagarapim ples long Morobe, Kimbe i bin kisim taim tu long bikpela ren. Nau yet traipela mama bilong raun win i wok long kilim ol man i dai long Amerika. Olgeta ol dispela samting i kamap nau em asua bilong yumi ol man yet. Diwai i sanap, yumi daunim. Em nau. Sapos yumi no lukluk gut, bai mipela karim moa hevi olsem ol arapela kantri.

Lida mas kisim mekimsave - Polye

MINISTA bilong Trensport na Sivil Eviesen na Haia Edukesen, Don Polye i autim strongpela bel kros agensim banis bilong ol lida long lusim wok sapos ol i go long kot bilong ol lida.

Em i tok olgeta lida i mas kisim glasim long pablik na lo bilong kantri sapos ol i abrus long wok bilong ol olsem lida o brukim lidasip kod.

"PNG bai strongim lidasip pasin i gat stret-

pela pasin, transparensi na akauntabiliti olsem wanem sapos mipela i banisim ol lida long ol lo bilong kantri?" em i askim.

Mista Polye i tok maski ol lida i kisim luksave bilong pipel, ol i nogat rait long brukim lo o mekim pasin i no bihainim stret pasin bilong gutpela lida.

"Mi salensim olgeta lida long pait agensim

korapsen na pasin nogut.


Em i tambu tru long traime senisim mama lo na lidasip kod! Pasin korapsen insait long PNG bai go bikpela moa yet sapos mipela i rausim ol opis bilong Ombudsman, ol lidasip kot, ol kot sistem na ol arapela opis i save was long ol lida."

Pati no laik sapotim memba

PIPELS Eksen Pati i bin tokaut dispela wik olsem ol toktok bilong memba bilong Lagaip Pogera long senisim lo bai ol memba i no inap lusim wok sapos ol i brukim lo em ol toktok bilong em yet na i no toktok i kam long pati.

Nesenel Sekreteri Jenerel bilong Pipels Eksen Pati, Luimek Johnson i salim wanpela tok-save i go long ol nius midia na tok olsem memba bilong Lagaip Pogera i no makim maus bilong Pipels Eksen Pati long wanem em i no memba bilong pati moa.

"Pipels Eksen Pati bai bihainim gutela wok na nem, ol polisi na stia insait long Pati. Konstitusen bilong em we ol bikpela lida bilong bipo yet i bin sanapim."



FRAN: Pes bilong ol 30 yia medol



BEK: Baksait bilong 30 yia medol.

Nominesen pepa bilong PNG awods i go aut

Neville Choi i raitim

PEPA bilong makim ol manmeri i mekim bikpela wok bilong strongim kantri na ol pipel i go aut pinis long olgeta provins.

Siaman bilong Nesenel Ivens Kaunsil na Minista bilong Inta Gavman Rilesens, Sir Peter Barter i tokaut long dispela wik olsem nominesen pepa i wok long go aut pinis bilong pablik long makim ol manmeri bilong kisim luksave aninit long nupela awot sistem bilong Papua Niugini yet.

"Ol nominesen pepa bilong ol medol i go aut long olgeta provins na bai stap insait long ol niuspepa na toksave bai kamap long redio tu. Ol manmeri husat i laik makim ol man o meri bilong kisim luksave long namba 30 independens anivesari i mas stretim ol dispela nominesen fom na salim i go long ol distrik na provinsel etministreta na Nesenel Memba bilong Palamen na ol bai makim husat ol manmeri bai kisim luksave," Sir Peter i tok.

Em i tok tu olsem ol medol bilong ol polis, CS na ami bai go aut bihain long namba 30 anivesari.

Ol Oda bilong Logohu o Kumul bai kamap namba wan taim long makim namba 30 independens bilong kantri.

Insait long Nesenel Kapitel Distrik yet, ol nominesen pepa i mas go long opis bilong Nesenel Ivens Kaunsil.

Yunivesiti komiti redim ripot

KOMITI i lukluk long ol hevi i kamap long Yunivesiti bilong Papua Niugini (UPNG) long Waigani long Mosbi long mun Julai i pinisim wok long kisim ripot long dispela wik na klostu taim, em bai givim ripot i go long Haia Edukesen Minista Don Polye.

Long mun i go pinis, ol sumatin bilong UPNG i bin lusim skul long tripela wik long soim bel kros bilong ol long grading sistem o rot we ol i givim mak bilong wok bilong ol. Ol i bin sutim tok long Vais Sansela i save daunim ol mak na ol bin laikim bai UPNG

i glasim na rausim dispela sistem na painim sampela gutpela rot long makim ol.

Bihainim straik na ol bagarap i bin kamap, ol bin putim taim tambu o kefiu long kempus.

Ol laspela lain we komiti i bin kisim toktok long ol em polis na Opis bilong Haia Edukesen (OHE).

Komiti Siaman Dokta Thomas Webster i tok ol i kisim OHE long dispela wok painimaut bikos OHE i save yusim Gret Poin Averej (GPA) sistem long givim TESAS skolasip i go long ol sumatin long go long ol

Yunivesiti na ol arapela teseri institusen.

Komiti i bin kisim ol toktok long ol woklain, ol leksera na ol arapela moa husat i bin stap insait long dispela hevi na kamapim ripot.

Komiti i bin wokim ripot long wanem as tru na hevi i bin kamap, rot we ol atoriti i bin bihainim long stretim hevi na rot long abrusim kain hevi long bihain taim.

I gat ol arapela ripot Komiti i bungim wantaim insait long ripot bilong em.

Wari long bikpela solwara na hevi ren

BOGENVIL i luksave olsem em i gat bikpela hevi long solwara i wok long go insait na karim graun long ol liklik ailan na bikpela ren na taitwara i bagarapim pipel na ples long saut Bogenvil.

Etministreta Peter Tsiamalili long dispela wik i tok dispela hevi i no kamap nau tasol em i samting we i wok long kamap olgeta yia na i go het yet.

"Solwara i go bikpela na karim graun, ples na bagarapim ol gaden kaikai na ol haus long ol liklik ailan na weda (taim bilong san, ren na win) i senis long Saut Bogenvil na ren i pondaun olgeta taim.

Siwai na Torokina long saut Bogenvil i kisim taim nogut tru wantaim ol bagarap na hevi. Bai yumi mas lukluk long dispela olsem bikpela hevi na wokim samting," Mista Tsiamalili i tok.

Em i tok Etministresen na Otonomes Bogenvil Gavman i lukluk long putim ol pipel bilong atolls na moa yet, ol Katerets Ailan lain long wanpela ol plantesen long Bogenvil we i nogat lain i wokim samting long en.

Em i tok ol i toksave pinis mas kam long ol eria olsem Siwai na Torokina we hevi i bagarapim ol tru.

Si hos risets stadi kisim helpim mani

Frank Aseili long UPNG i raitim

RISES senta bilong Yunivesiti ov PNG (UPNG) i winim tupela yia riser projek we AusAID na Pasifik Saiens Faundesen bai givim mani long kari-maut.

Motupore Ailan Rises senta (MIRC) bilong UPNG i winim dispela riser projek bilong kari-maut riser long si hos, ol kain si hos i stap, long wanem hap na tred long si hos insait long kantri.

Si hos em ol liklik animal long solwara na ol i luk olsem hos.

Ol i save yusim sihos olsem piksa bilong ol naispela samting we man i laik lukim na kisim moa save long en long laip insait long solwara.

Wari long ol si hos bai bungim hevi na bagarap i wanpela wari we planti pipel i stap

long ol nambis komyuniti long wol i gat long em.

Dairekta bilong MIRC Dokta Mark Baine i tok sapos ol i kamapim projek long sevim ol si hos, bai ol i ken kamapim gutpela samting long ol arapela animal samting bilong solwara. Em i tok long Filipins, ol i kamapim wanpela eria we ol i putim tambu na komyuniti i save lukautim bihainim wari longol si hos.

Em i tok antap long wok bilong ol si hos olsem fleksip long konsevesen o wok long lukautim ol animal samting bilong solwara, ol si hos i gat narakain ples na wok ol i gat long planti plesd ol i stap long en.

'Ol i gat ai we i ken lukluk i go longwe, i gat teil, ol i ken senisim kala na hait na ol man o birua i no inap painim ol. Na ol i narakain stret na ol i gat namba long animal kingdom we ol

man si hos i save gat bel," Dokta Baine i tok.

Maski ol i karimaut ol stadi bilong save moa long ol si hos, na wok bilong sevim environmen na ol samting i stap insait long solwara, i gat planti samting yet we yumi mas lainim long ol na ples ol i stap long en.

Long PNG, ol no kari-maut wanpela riser long si hos populesen long solwara bilong em, maski ol i lukim PNG olsem wanpela top ples i gat ol kain diwai na animal insait long tropics.


Stat yet long taim ol i karimaut wok painim long ol si hos, tred long ol si hos long PNG i go antap moa long 70 kantri long wol i i stap insait long tred bilong ol si hos.

Olsem na Dokta Baine i tok i moabeta PNG i gat riser long save tru populesen bilong ol si hos long PNG.



Foto: ALOYSIUS LAUKAI

KLIA LONG OL: Noken ting olsem ol polis meri tasol i ken mas. Ol meri Bogenvil i ken wokim wantaim stail long lons bilong maikro fainens skim aweanes program long Kokopau, Buka.



LUKAUT LONG SOLWARA HOS: Tru tumas, i gat hos bilong solwara ol i kolim long Si hos bai wok risets i kamap long en.

Tisa Sevings opis bai op long Kimbe

Stephen Kadiko i raitim

OL tisa long Wes Nu Briten i amamas nau olsem hevi bilong ol bai pinis nau long wetim tok orait long kisim lon o dinau mani long Tisa Sevings na Lon Sosaiti rijinel opis long Rabaul.

Long dispela mun Septemba, Tisas Sevings na Lons Sosaiti bai opim han long Kimbe taun, provinsel hetkwota bilong Wes Nu Briten, long sevim ol tisa.

Wes Nu Briten i gat moa long 4,000 tisa na moa long dispela namba i memba long sosaiti. Liklik lain tasol i no memba yet.

Ol opisa bilong TSL het opis long Pot Mosbi i bin kam mekim wanpela lukluk raun long Kimbe na painim pinis wanem hap ol bai sanapim dispela brens long em. Ol dispela opisa i go bek pinis na bai ol i redi long putim aut ol toksave long niuspepa long ol

posisen bilong dispela nupela brens. Nupela brens ya bai oraitim dinau mani inap long K2,000 na wanem namba antap long dispela em ol bai salim i go long rijinel opis long Rabaul.

Tasol man i lukautim Kimbe TSL opis Mista Loke i tok em bai pait hat long apim dinau mani mak i go long K4,000.

Mista Loke i tok Wes Nu Briten em i ples bilong mani na ikonomi bilong em o rot we em i winim mani long em i winim ol arapela rijen. Na bai luk moa gutpela long brens i mas oraitim dinau mani long K4,000 mak na i no long K2,000 bikos dispela i liklik tumas.

Mista Loke i tok dispela brens i ken sevim tu ol arapela pablik sevan o wok manmeri bilong gavman husat i no ol tisa long kamap memba bilong sosaiti. Ol lain i aplai long kisim lon o dinau mani bai i kisim long sem de tasol.

Sevim nau bilong helpim bihain taim

Aloysius Laukai i raitim

BIKPELA selebresen i kamap long Bogenvil long dispela wik taim provins i lonsim aweanes kempen bilong sevim mani long luksave long Intenesenel Yia bilong Maikro Kredit.

Selebresen i bin stat long Mande wantaim ol toktok we ol lida i bin mekim long Kokopau Distrik opis long hap sait long Buka Basis.

Dispela kempein em i hap bilong projek bilong Esia Developmen Beng na ol patna bilong karimaut aweanes olsem i gat nid o wok long wokim sevings long Maikro Fainens skim we bai helpim long bihain taim o taim i gat wok bilong em.

Konsal Dowi na Asosiets (CDA) em wanpela fainens kampani bilong Bogenvil i sponsaim ol spot pila resis olsem tas ragbi, boksing, tae kwando, soka, volibal bilong ol man na meri, kanu resis, kalsa so na ol pawa ben resis.



Foto: ALOYSIUS LAUKAI

SEVINGS MAS: Ol Bogenvil lida i go pas long opim Maikro Fainens seving aweanes wik. Fainens Minista Joseph Watawi i go pas na Presiden Kabui na ol narapela i kam bihain.

Sief Eksekutiv opisa bilong CDA Robert Atsir i tok wokim sevings o sevim mani em i nupela samting long ol pipel bilong Bogenvil na kempein i bilong helpim skulim ol pipel

olsem i gat wok long gat sevings long helpim kamapim gut laip na sindaun bilong ol.

Mista Atsir i tok rekot i soim olsem 30 pesen tasol long pipel insait long PNG i gat ol beng akaun taim bikpela mak inap long 70 pesen i nogat sevings long wanpela beng.

Aweanes i makim long kisim planti pipel i strongim tingting na wokim sevings.

Em i tok ol beng i save mekim hat long ol manmeri bilong ples long opim ol akaun na dispela i mekim Maikro Fainens skim olsem wanpela rot tasol planti pipel i ken go long em.

Presiden bilong Otonomes Bogenvil Gavman (ABG) Joseph Kabui na Minista bilong Fainens Joseph Watawi i bin opim dispela aweanes kempein selebresen. Ol lain i makim Hagen Maikro Fainens na Esian Developmen beng i lukautim ol Maikro Fainens projek long PNG i bin witnessim tu opening selebresen. Wanpela wik selebresen bai pinis long Sarere.




Foto: LUCKY BERNARD

HATIM KUNDU: Kalsa i bikpela samting tumas long ol dispela manki Niugini Ailans i paitim kundu i stap.

Schnaubelt plen long helpim ol yut

MAN i makim ol yut long Nu Ailan Provinsel Gavman Walter Schnaubelt i redi long karimaut ol wok bilong helpim ol yut.

Mista Schnaubelt i mekim ol wok redi bilong holim tupela yut woksop long Kavieng na Namatanai long dispela yia.

Em i toktok wantaim Nesanel Yut Komisn long Pot Mosbi long ol dispela woksop we bai kisim tingting i kam long ol stekholda na yut na helpim long kamapim ol

polisi plen long kamapim wanpela pemenen Yut Polisi bilong Nu Ailan provins.

Long bekim ol toktok bilong Bruno Evanmale bilong Lihir Ailan husat i no wanbel long ol samting we Mista Schnaubelt i laik mekim, em (Schnaubelt) i tok em i bikpela samting long gavman o wanem oge-naisesen i mas gat plen na klia stia long bihainim na Nu Ailan i mas bihainim dispela tu. Mista Schnaubelt i

tokim Mista Evanmale long noken pilaim politiks bikos dispela i no ansa bilong helpim ol wok go het bilong ol yut insait long provins.

Em i tok welkam long mist Evanmale long kamapim sampela gutpela tingting long helpim ol wok developmen bilong ol yut long provins.

Long wankain taim, Mista Schnaubelt i laik askim ol dona ejensi long helpim go hetim ol yut program bilong dispela yia.



PNG EVENTS COUNCIL SECRETARIAT

ATTENTION ALL SCHOOLS IN NCD

FULL



REHEARSAL

THE FULL REHEARSAL FOR PARTICIPATING SCHOOLS IN THE 30TH INDEPENDENCE ANNIVERSARY PAGEANT WILL BE HELD AT THE SIR JOHN GUISE STADIUM ON THESE DAYS:

TUESDAY 30TH AUGUST 12 NOON - 4 PM
THURSDAY 2ND SEPTEMBER 12 NOON - 4 PM
TUESDAY 06TH SEPTEMBER 12 NOON - 4 PM

DOBI KIDU - DIRECTOR/CHOREOGRAPHER
 FOR FURTHER INFORMATION CONTACT THE EVENTS COUNCIL SECRETARIAT ON
PH: 323 4255

Ren na taitwara bagarapim Lae

Yowakicte Buafec i raitim

OL PLES ausait long Lae siti insait long Wampar eria i kisim bikpela taim stret long ren na bikpela taitwara we i bagarapim planti ples olsem wanpela ples ol i kolim Pupuafin viles insait long Wampar lokol level gavman eria long NADZAB.

Dispela ples nau i kisim bagarap na ol pipel i stap long hap i lusim planti samting bilong ol long Wara Narusi. Dispela wara i bin ron strong moa wantaim bikpela tait na i brukim arere bilong en we i rausim ol gaden kaikai bilong ol i stap klostu long dispela wantaim ol haus bilong ol.

Tupela ples man bilong dispela hap, John na Andrew Masio husat i gat ol kakaruk fam i lusim planti kakaruk bilong tupela long taim bilong dispela bikpela ren na taitwara i bin kamap las wik Fraide.

Sampela ol kakaruk famas tu ol i bin hariap tru long rausim ol kakaruk bilong ol na ol i putim antap long gutpela hap graun.

Wanpela liklik bisnis kakaruk fam holda tu long Durum Siken fam, Gibson Korope i tokim Wantok Niuspepa olsem dispela ren na taitwara i bin bagarapim sindaun bilong planti pipel tru.

Mista Korope i tok planti fama i lusim planti handret kina long ol samting ol i lusim wantaim ol gaden kumu na kes krop bilong ol we ol i no inap salim long bikpela maket long Lae long wanem dispela ren na taitwara tasol i bin bagarapim ol.

Morobe Provinsel Gavman Etnimistreta Manasupe Zurenuoc i tok Boana rot tu insait long Markham eria i bin bruk long Hailans Haiwe bikos graun i bruk na bikpela ren na taitwara tru.


Mista Zurenuoc i tok insait long Ami Sut setelmen long Lae Baundri rot, 4-pela haus i bin bruk na pundaun na 51 manmeri i bin lusim haus bilong ol long ren, taitwara na graun i bruk.

Em i tok i bin gat 4-pela man i bin go long Angau haus sik husat i kisim bikpela bagarap long taim bikpela ren na taitwara i bin holim ol.

Disasta opis i bin helpim ol long saplaim ol haus sel long ol pipel long taim bilong dispela bagarap i kamap.

Mista Zurenuoc i tok tu olsem 300 samting marimeri long Wes Taraka husat i bin sindaun long hap graun bilong kisim taitwara em provinsel gavman i bin givim planti tok lukaut pinis na ol i no harim tok. Olsem na gavman i no inap lukluk long ol dispela lain. Em i tok tupela arapela haus i bin lus long Bumayong taim bikpela tait wara i kam.

"I no bin gat namba bilong man i dai o kisim bagarap na dispela taim nogut i bin kamap long Huon Galp eria tasol na i nogat wanpela i bin kamap dispela taim," Mista Zurenuoc i tok.



LUKIM TAITWARA: Ol manmeri i sanap na lukim Wara Bumbu i solap.



NOGAT HAUS MOA: Ol dispela lain famili long Bumbu i nogat haus moa. Bikpela ren na taitwara i kam na bagarapim pinis.



RONAWE LONG WARA: Ol manmeri i wok long ronawe long taitwara.



SKELIM BAGARAP: Morobe Gavana Luther Wenge i bin raun lukim bagarap bilong ren na taitwara.



NOGAT ROT: Ol manmeri na ol kar i sanap long Yalu bihain long taitwara i brukim rot na pasim ol.

Man Bundi strongim masrum marasin

Yowakiecte Buafec i raitim

WANPELA waitman tumbuna marasin ol i save kolim kombucha ti nau bai kisim luksave bilong wanpela as ples dokta bilong Bundi long Madang.

Dokta Bonny Kouno husat nau i stap long 9 mail ausait long Lae siti i go pas long kamapim tupela bikpela projek bilong em aninit long wanpela bisnis bilong kampani bilong em Koronga Masrum Ti Marasin bihain long dispela yia.

Dokta Bonny i tok olsem dispela em i namba wan taim em i laik go insait long tupela bikpela projek long mekim kamap masrum sop bilong waswas na wanpela masrum vidio

CD bilong kisim ol piksa bilong ol peisen o manmeri i kisim tritmen long dispela ti.

Ripot i kam long Lae i tok em bai wokim kamap masrum bat sop bilong olgeta kain kain sik bilong skin olsem sanben, waitspot, dendraf, groim gras, rausim grille, seibis na planti arapela sik bilong skin long bodi we em bai kamap na salim wantaim masrum kombucha ti marasin.

Em i save mekim na pekim long ol 500 mil kontena na saling.

Projek bilong em long mekim vidio piksa o CD em long soim klia long ol arapela manmeri long ron bilong yusim na strong bilong dispela masrum marasin. Dispela marasin i save helpim gut ol manmeri i gat sik.

Vanimo bai kamapim pis projek

Michael Novingu i raitim

IKLIK taun bilong Vanimo insait long Sandaun provins bai kam gut wantaim wanpela pis projek we bai kamapim planti sans long wok na tu bai apim na strongim ikonimi bilong provins.

Wanpela pising kampani long Lae, BSJ Fishing Trading Limited i bin kisim tok orait long ol papa graun na provinsel atorit long wokim pes sain pising long mani mak inap long K20 milien. BSJ Fishing & Trading bilong lae bai developim inlen pising projek insait long Morobe provins we wanpela tok orait ol i bin sainim wantaim Morobe

Piseris Atoriti we em bisnis bilong Morobe provinsel gavman. Dispela pis fam plen bai ol i wokim insait long sampela hap bilong morobe provins long moni mak inap long K50,000.

Long Vanimo, dispela kampani bai wokim 300 tan drai dok, opis na haus bilong stretim ol umben bilong kisim pis.

Dispela hap bai stap long helpim kampani long lukautim 4-pela sip bilong ol long karim pres tuna na salim i go long rip ketsa bot long karim i go long ol arapela hap bilong kantri na long ovasis tu.

Bosman bilong BSJ Fishing na Treding Kampani Sam basil i tok

dispela em i namba wan taim bilong wanpela nesenel kampani long kamapim pes sain piseri.

"Projek ya bai stap long Vedu na Mayhajong ples we mi paitim toktok wantaim Sandaun Provinsel Gavman na ol papa graun we ol i tok orait long dispela projek bai go het," Mista Basil i tok. Em i tok moa olsem kampani bilong em i tingting strong long kamapim dispela wok we bai i karim gutpela kaikai bilong ol as ples na tu, Sandaun provinsel gavman. Mista Basil i tok em bai kisim 25 man PNG long wok long ol ketsa bot na ol arapela long rip bot.

Askim go long Gavman long stop yusim gumi

TOK agensim promotim bilong gumi olsem rot bilong daunim AIDS binatang long PNG i wok long pulim moa sapot na dispela taim, ol sios na yut long Hela rijen insait long Sauten Hailans i kam insait.

Na singaut i go long gavman long stopim kampani i save wokim gumi bikos em i kamapim bagarap long planti yangpela pipel.

Las wik, ol Katolik mama long Pot Mosbi Asdaiosis i bin holim wanpela bung long tok agensim pamuk na yusim gumi olsem banis bilong binatang bilong AIDS.

Ripot i kam long Hela rijen i tok ol sios na yut manmeri long Hela i no amamas long helt Dipatmen i wok long promotim gumi long ol niuspepa na long ol bikpela

stoa olsem TST, Stimsips na ol arapela moa bilong tokaut long pablik olsem yusim gumi i gutpela rot long abrusim binatang bilong sik AIDS.

Ripot i tok planti yangpela pipel i bagarap bikos ol i ting gumi bai lukautim ol na ol i yusim (gumi) long slip nabaut wantaim ol meri.

Ripot i tok pasin bilong yusim gumi nau i paia olsem bus paia tasol em i no seif tumas long yusim.

Ripot i tok gumi i stap long olgeta hap na sik AIDS tu i wok long kamap klostu klostu.

Ripot i tok dispela gumi bilong yusim taim yu slip wantaim meri long abrusim binatang bilong AIDS i wok long promotim tu dispela sik long go bikpela long ol arapela manmeri.

Glasing fri edukesen

FRI edukesen polisi long Sauten Hailans i no wok gut tumas na i gat singaut long glasing na skelim gen.

Na Katolik Bisop bilong Mendi long Sauten Hailans Bisop Stephen Reichert husat i sapotim wok glas long kamap long dispela i tok ol papamama i mas peim haf skul fi long provins sapos ol i laikim ol pikinini i kisim gutpela skul.

Bisop Stephen i wokim dispela toktok long pasim Edukesen Rifom woksop ol bin holim long Kumin Top Ap skul long Mendi las wik.

Bisop i tok tru, dispela polisi i bin kamap wantaim gutpela tingting, em i no wok gut na olsem, ol i mas glasing gen polisi. Em bin tok tu olsem ol

papamama, ol tisa, ol meri na yut grup i mas stap insait long rivyu wok bilong polisi.

Em i tok long dispela rot, ol bai luksave long hevi na kamapim gut polisi.

Wanpela bikman tisa i bin autim tingting bilong em olsem tru, ol i kamapim polisi long fri edukesen wantaim gutpela tingting, em i kamapim hevi we ol skul saplai i kamap leit, ol arapela samting moa i no go rait na planti skul i save pas na dispela i bagarapim skul bilong ol pikinini.

Gavana Hami Yawari i no bin amamas tumas long toktok bilong Bisop Stephen na i bin autim tok lukaut long stopim subsidi i go long o Katolik skul, tasol Bisop i bin sanap strong

long toktok bilong em na tok ol Katolik skul i save sasim ol skul fi bikos em i laikim ol pikinini i gat kwaliti edukesen.

Mista Yawari i no bin wanbel long salens em i kisim long fri skul fi polisi bilong em tasol em bin luksave olsem rivyu long polisi i mas kamap bihainim ol hevi em i kamapim.

Em i wok bilong gavman long lukautim ol manki taim ol i stap long ol liklik skul long wanem em rait bilong ol pikinini long kisim besik edukesen.

Tasol hevi long gavman long helpim ol manki i stap long mani. Gavman i nogat mani long baim skul fi bilong ol pikinini na olsem kain gavana olsem Yawari i traim tasol i hat yet long helpim gut.



KALSA KUKIM OL: Ol yangpela Sili Muli gels bilong Hagen i kirapim das wantaim naispela bilas na stail tumbuna danis na singsing bilong ol.



SKELIM STAIL: Hai Komisina bilong Australia Michael Potts i bin kisim bikpela tok welkam long Enga So taim em i go lukluk raun.

Air Niugini stopim ron long Mendi

OL pasindia i laik go long balus long Mendi insait long Sauten Hailans bai nogat nau bikos ples balus i bagarap i stap.

Long ol ripot, ples balus i gat ol bikpela hul we i kamapim hevi na ol balus i no inap long pondaun.


Air Niugini i bin stopim ol ron long balus bilong em las Fraide na tokim ol lain husat i bin wokim buking i go long Mendi long senisim wokabaut bilong ol na kisim balus bai i go olsem long Tari o Hagen ples balus. Air Niugini i tok em bai ino inap long

kamapim senis o givim helpim long pe bilong ples bilong slip o kaikai bikos long dispela senis.

Em i tok inap Civil Aviesen Atoriti i wokim samting long daunim hevi, balus bilong Air Niugini i no inap long go long Mendi bikos


em i no laik putim ol pasindia na balus.

Ol ripot i tok gavman bilong Sauten Hailans i bin tok em bai katim sampela mani long baset bilong dispela yia long stretim ol hevi tasol nogat samting i kamap long dispela.



DELTA

DAIHATSU Powered by Toyota Diesel Engine



PROVEN
IN PNG

K69,990*

Drive Away!

*Conditions Apply

Contact : Jim Maxwell : Ph **3229400** or Email : jmxv:ell@elamotors.com.pg

Ela Motors
TRUCKS

WE PROVIDE ✓ TOTAL SALES ✓ PARTS & SERVICE BACKUP ✓ FINANCE ✓ LEASE PACKAGES

Jimmy Barnes sapotim ol yut



SKELIM: Jimmy i sanap wantaim ol lain musik man bilong Baruni taim ol i singsing.

Andrew Molen i raitim

GUTPELA wok bilong Nesanel Kapitel Distrik Komisin (NCDC) long yut progrem bilong ol i pulim ai bilong wanpela biknem musik atis bilong Australia - Jimmy Barnes.

"Em i isi long go insait long bikhet pasin na kamapim trabol tasol yupela i noken mekim, wokim sampela gutpela samting long helpim kantri," Mista Barnes i tok.

"Sevim ol pikinini bilong yupela na sevim kalsa bilong yupela.

"Yupela i gat wanpela bilong ol naispela kantri stret insait long wol olsem na yupela i mas soim kantri bilong yupela long wol," em i tok.

Jimmy i tok tu olsem em yet i wanpela bikhet manki taim em i yangpela tasol em i senis taim em i kamap musik atis.

"Musik sevim laip bilong mi na em i ken sevim laip bilong planti bilong yupela tu," Barnes i tokim ol yangpela.

"I gat planti gutpela lain bilong musik na ol narapela samting olsem spots i stap tasol ol i stap hait."

Mista Barnes i go raun lukim Baruni ples las wik

Fonde taim em i kam long pilai long Pot Mosbi. Em i bin harim toktok bilong ol yangpela na laip bilong ol insait long ol bikhet pasin, nogat wok, sindaun bilong ol insait long komyuniti na wanem kain senis i kamap anini: long dispela nupela progrem.

Wok bilong dispela i kamap long wanpela progrem bilong NCDC na Lo na Jastis sekta ol i kolim "Yumi lukautim Mosbi" we gavman bilong Australia i sapatim aninit long AusAID progrem bilong ol na ol narapela long traime na lukluk long ol rot bilong daunim hevi bilong lo na oda insait long komyuniti.

"Mi laik tok amamas olsem Jimmy Barnes i save wok bung wantaim long sait bilong Lo na oda na mi amamas tu olsem em i kamap long hia bilong wanem planti yangpela manmeri i save lukluk i go antap long kain ol bik nem lain olsem yu long mekim kain wok olsem," Siti Menesa Peter Loko i tok.

Em i tok ol yut long Baruni i wok bihainim het toktok bilong ol; "Drop the Gun, Pick up the Shovel."

Mausman bilong Hetura yut grup, John Dirtzwhyte i tok ol yangpela i stap raun nating tasol i nogat man long helpim ol na soim ol wanem

samting long mekim olsem na ol i save go mekim trabol.

"I nogat wanpela man i stap long kisim mipela long wokbung wantaim komyuniti olsem na mipela i save stap mipela yet na kamapim trabol," Mista Dirtzwhyte i tok.

Em i tok tenkyu long Mista Barnes long givim taim bilong em long mekim ol gutpela toktok long strongim ol.

"Sapos kain ol samting ol dispela progrem na kain ol pipel i kam toktok long mipela bai mipela i mekim sampela gutpela wok na i no inap mekim ol dispela samting we i nogat gutpela samting bilong ol," em i tok.

Dispela grup bilong ol yangpela man i painim rot long kamapim wok bilong ol na ol i save raun na klinim ples long ol komyuniti bilong ol olsem dikim baret, katim bus, stretim ol ovol na planti narapela wok we i lukim ol i winim wanpela kontrak bilong kisim K2000 long wanpela mun wantaim NCDC long klinim na lukautim ol strit.

AusAID tu i givim han long dispela wantaim ol tuls o samting bilong ol wok long helpim ol.

- LUKIM MOA STORI NA OL PIKSA BILONG JIMMY BARNES I PAIRAPIM MOSBI LONG PES 21



GRIN-FINGA: Darryl Bomo bilong Morobe i save stap long 6-mait long Mosbi sti na em i man bilong laikim ol plawa na sapos yu olsem em, putim ai tasol long Darryl taim yu raun long ples Jacksons ples balus na Gordons Intanesenol skul na bai yu bungim em i salim ol Orchid em i save kisim long bik bus stret. Em i save salim K5 long wanpela bikpela mekpas.

OI PNG RAMSI polis i kam bek

Andrew Molen i raitim

WOK bung wantaim em i bikpela samting stret i no save kamap planti taim long Papua Niugini.

Dispela em i tingting bilong wanpela long tupela PNG polismeri husat i wanpela long tenpela polis opisa husat i go stap wok long Solomon Ailans long Rijnel Asisten Misen long Solomon Ailans (RAMSI) wantaim Australia na ol narapela Pasifik kantri.

Sinia Konstabel Clare Rambui tokaut long dispela taim ol i kam bek long Pot Mosbi bihain long wanpela yia long Solomon Ailans.

"Wanpela bikpela ekspiriens bilong mi long hap em long pasin bilong wok bung," Sinia Const. Rambui i tok.

"Yumi gat dispela long hia tu tasol long hap em i wanpela bikpela samting tru.

Clare, husat i save wok long Yalibu polis stesen long Sauten Hailens provins i kra i amamas



KAM BEK PINIS: Tupela Sinia Konstabel Alice Arigo (wantaim kep) na Clare Rambui i bin amamas tru long kam bek long PNG.

olsem wok bilong ol i go orait tasol na nau ol i kam bek long ples.

Polis Komisina Sam Inguba i bin stap long ples balus long kisim ol polis manmeri i kam bek na em i autim bikpela amamas long ol.

"Long makim maus bilong gavman, polis na ol famili bilong yupela mi laik tok olsem yupela i mekim mipela i amamas tru," Komisina Inguba i tok.

"Gutpela wok bilong yupela olsem ol brata bilong yupela long PNGDF i

soim olsem yupela ol gutpela mausman bilong kantri na ol famili bilong yupela olsem mipela bai amamas tru long yupela," Komisina Inguba i tok.

Sief Inspekta Tony Duwang husat i go pas long grup olsem komanda i tok em i amamas tu long ol opisa bilong em na tu long kam bek na lukim ples gen.

"Olsem yu tok, komisina, mipela i wok gut tru na dispela i soim olsem PNG polis i gat planti samting long givim long kain ol wok olsem.

FIRE PROOF FILING CABINETS & SAFES

Top Price - Top Range

See Our Sales Team.

THEODIST LTD
THE STATIONERY SUPERMARKET

Port Moresby (Waigani Drive) Lae (Milfordhaven Rd)
Tel: 325 6500. Tel: 472 5488.
Fax: 325 6302 Fax: 472 7838

Ol yangpela mama kisim salens

Veronica Hatutasi i raitim

STRONGPELA askim i go long ol yangpela mama long go insait long ol sios mama grup long helpim kamapim gut laip bilong ol na komyuniti.

Presiden bilong Sen Peter Sanel Peris Erima Mama grup Eliana Aileen Robert i wokim dispela singaut wantaim sapot bilong tupela yangpela mama memba bilong grup em, Annie Ruatoka na Athanasius Sere.

Ol mama grup i save mekim bikpela wok long sapotim wok bilong ol wan wan peris na givim sevis long ol famili na komyuniti.

Erima Peris i gat samting olsem 62 mama long peris Mama grup na ol bi long olgeta rijen long kantri.

"Bikpela salens em long kisim moa yangpela mama long kam insait long grup na bai mipela i ken wok, pre na sea wantaim long kamapim gut laip na sindaun bilong mipela, famili na komyuniti. Bikpela wari long stap bilong yumi tude em ol hevi i kamap long famili. Ol papamama na pikinini mas pre wantaim long strongim gutpela Kristen pasin. na em i stat long famili. Sapos ol papamama i wok gut wantaim, ol pikinini bai groap long gutpela Kristen pasin," Eliana i tok.



YUPELA KAM: Eliana, Athanasius na Annie i toktok long wok bilong ol meri.

Athanasius i wanpela yangpela mama na em bin bihainim mama bilong em na go insait long Sen Peter Sanel Mama grup long 1996.

"Mi lainim planti gutpela samting na mi amamas tru long stap insait long mama grup bilong peris. Em i gutpela long bung wantaim ol arapela mama long sea na go aut wokim ol sosel sevis na komyuniti wok long haus sik, kalabus na ol famili. Mipela i save kukim kaikai, redim ol klos na go lukim ol lain ya. Ol i save amamas tru na mipela tu i amamams long helpim ol. Mipela i lainim tu long kuk,

wokim ol bekyat gaden, somap na ol arapela moa. Famili bilong mi i givim mi bikpela sapot long mekim wok wantaim Mama grup," Athanasius i tok.

"Rot we ol yangpela mama i go insait long grup em ol i harim long ol narapela poromeri. Na mi amamas long kam insait long grup.

Pastaim mi kam, mi save sem tasol wantaim gutpela stia bilong ol bikpela mama, mi pilim strong na mi amamas long lainim planti samting long helpim mi long spirituel na sosel sait, lukautim famili na ol

arapela eria," Annie Ruatoka i tok.

Tupela yangpela mama i tok i lainim planti samting na tu helpim ol famili na komyuniti na askim moa yangpela mama long go insait long grup.

Antap long ol sosel na spirituel wok, ol Erima mama i save sapotim sios wantaim mani bilong baim lait bil bilong hol na sios na ol arapela wok peris i gat long en.

Ol i save wokim ol fan resing olsem basket senis wantaim ol mama bilong ol narapela peris na salim ol kuk kaikai olgeta Sande bihain long misa lotu long kisim mani na karimaut wok bilong ol.

Lo bilong Lukautim ol Meri



TUDE long PNG, ol kain senis i kamap long famili. Planti marit i bruk na papa i lusim ol pikinini wantaim mama na bikpela hevi i pundaun long mama na ol pikinini.

Planti mama i no klis long wanem samting ol i ken mekim long kisim helpim taim papa i lusim ol. Dispela em Mentenens na Kastodi bilong ol pikinini bilong ol marit meri.

Long ol wok i kam, Meri Wantok bai putim ol dispela samting na ol meri i ken klia long en.

Man bilong yu i lusim yu?

Man i save mekim nogut long yu na yu lusim em?

Man i no moa lukautim yu na ol pikinini?

Man i traime nau long kisim bek ol pikinini?

Sapos yu marit meri na yu gat dispela kain wari, orait, ol dispela toksave Wantok bai autim i soim yu ol rot bilong askim DISTRIK na LOKOL KOT long helpim yu.

Sapos yu no marit, yu ken kisim toksave pepa Namba 3: "Affiliesen na Kastodi bilong Pikinini bilong ol Mama i no Marit" long Welfea opis o long haus kot.

OL Toktok i kam long Pablik Toksave Pepa Namba 2 we Women and Law Committee i redim. Telipon: 3258755. Etres: Women and Law Committee, P O Box 3439, Boroko, NCD, PNG.

Moa long neks wik.

Sotpela Tok Lukaut: Skrum tok long HIV/AIDS

SAMPELA taim, ol famili i save kros na sutim tok long husat tru i kisim HIV i kam insait long famili. Dispela i ken kamapim hevi na sindaun i no gutpela long famili. Em i ken kamapim hevi long ol plen bilong bihain taim bilong famili. Sampela pipel i bilip olsem husat i kamapik pastaim em dispela i kisim sik i kam insait, tasol dispela i no tru olgeta taim. Em i tru long tingting long husat tru i kisim binatang bilong AIDS i kam insait tasol i no gutpela long kros na tok pait long en bikos em bai kamapim moa pen na hevi. Em i gutpela moa long wokim pasin bilong pogiv o lusim rong pasin bilong narapela, sapotim wanpela narapela, plen long bihain taim bilong ol pikinini na patna, lukautim ol pikinini na stap gut wantaim.

Kisim moa stia tok neks wik

Raun lukim ol meri na pikinini



MERI BLAUS KUKIM OI: Ol volunta meri dokta na nes bilong Australia i givim bikpela helpim long karimaut Hat Operesen long PNG long tok gutbai pati wantaim Gavana Jenerel.



LUKSAVE: Rait mama, Miva Morabang i kisim luksave setifiket long helpim bilong em long Hat Operesen. Miva i wok olsem Seketeri bilong Sief Eksekutiv Opisa bilong Pot Mosbi Jenerel haus sik.



EGENSIM: Ol Sen Peter's Erima mama i bin putim maus wantaim ol arapela wanlain bilong Pot Mosbi Katolik Asdaiosis long tok nogat long pasin pamuk na gumi.



MAMA SAPOT: Moa Katolik mama i bung na egensim pamuk ol long kantri.



Kuk Kona wantaim MERI WANTOK

Scallop Kebabs

Yu mas i Gat:

- 2-pela tebolspun oil
- 2-pela tebolspun soi sos
- 2-pela tebolspun lemon juis
- 2-pela tebolspun pasli hebs yu katkatim
- Haf tispun sol na pepa

We long Kukim:

- 1-Putim olgeta ol samting ya (ingridiens) long Kwik Seik na miksim gut.
- 2-Wokim ol kebabs wantaim skalops (kaukau o potato)nekon, painapel, anien, masrum o wanem samting yu laik wokim kebabs long en.
- 3-Putim long kontena na marinetim.
- 4-Marinetim long wanpela awa. Tanim i go planti taim.
- 5- Kukim long Babaklu.

STORI TASOL



wantaim

FR. PAUL LIWUN, SVD

OL Rida! Tenkyu tru long ridim na reflektim olgeta taim wantaim mi long kolum bilong mi "TOKTOK NATING". Planti bilong yupela i bin tok amamas long wanem samting mi save stori wantaim yupela.

Na planti bilong yupela i bin tokim mi olsem; wanem samting mi stori na serim em i NO TOKTOK NATING. Em i gat gutpela skul olgeta taim. Mi harim dispela komplek na mi tingting long senisim nem bilong kolum bilong mi. I gat 120 topik bilong TOKTOK NATING mi bin raitim.

Stat long dispela namba wik, mi laik senisim nem bilong kolum bilong mi na mi no inap yusim moa TOKTOK NATING. Nupela nem mi laik givim em STORI TASOL wantaim Fr. Paul Liwun SVD. Mi bilip olsem yupela bai amamas long nupela nem mi yusim nau. Tenkyu

LQNG bipo tru, i gat tupela brata i stap. Papa mama bilong ol i dai lusim ol. Tasol tupela i stap wanbel tru. Namba wan brata i marit na stap wantaim meri na pikinini long haus bilong em yet.

Namba tu brata i no marit na stap wanpis long wanpela haus bilong em yet. Tasol tupela i save wok bung long wokim gaden. Taim bilong bungim kaikai long gaden (haves) i kamap tupela i save skelim wankain skel na givim bek long ol yet. Long wanpela nait, namba tu brata i no marit yet i ting ting planti olsem: "I no gutpela mipela i skelim kaikai bilong gaden wankain skel wantaim brata bilong mi. Mi stap wanpis, na i nogat planti nid bilong mi. Brata bilong mi i gat meri na pikinini na lukautim bilong famili em i bikipela samting. Em i mas kisim planti kaikai bilong gaden bilong mipela".

Olsem na long biknait, em i go long rum kaikai bilong em na kisim wanpela bek kaikai na i bringim na putim isi tasol insait long rum kaikai bilong bikipela brata bilong em. Em i bilip strong olsem em bai inap long helpim brata bilong em long lukautim famili bilong em.

Long wankain nait, bikipela brata bilong em tu i bin wari na tingting planti long liklik brata bilong em. Em gat wari olsem: "Mi no mekim gut long liklik brata bilong mi. Bilong wanem mi mas skelim wankain skel bilong kaikai na givim liklik long brata bilong mi? Mi marit wantaim meri na pikinini. Ol bai lukautim mi taim mi lapun. Tasol brata bilong mi i nogat meri na pikinini. Husat bai lukautim em taim em i lapun? I nogat wanpela man o meri bai lukautim em. Olsem na brata bilong mi mas kisim moa kaikai bilong gaden bilong mipela. Mi mas givim planti moa long em".

Olsem na long nait em i hait na karim wanpela bek kaikai i go na putim long rum kaikai bilong liklik brata bilong em. Olgeta nait tupela i save wokim olsem. Tasol long moning, taim ol i kam long rum kaikai bilong ol, ol i no bin lukim samting i sot insait long rum kaikai bilong ol.

Tupela i wokim dispela pasin i go, i go, i go, na i nogat wanpela bilong ol i bin luksave olsem narapela brata tu mekim olsem. Inap long wanpela nait, tupela i wokim wok long wankain taim. Tupela i bungim ol yet long rot taim tupela i karim wan wan bek kaikai long putim long rum kaikai bilong arapela.

Tupela i luksave olsem tupela i save wari na tingting planti long ol yet na tupela i holim pas na krai nogut tru.

Nau tupela i luksave olsem maski tupela i no save autim wari bilong ol long ol yet, ol i pasim maus tasol na mekim wok long helpim narapela. Tru tumas, tupela i gat strongpela laik pasin long ol arapela.

Dispela strongpela laik pasin i bin mekim tupela i kamap strong long trupela pasin brata. Insait long bel bilong tupela i gat wanpela strongpela samting i mekim tupela i kamap wanbel olgeta taim. I no long bagarapim narapela. Nogat tru.

YACA kisim nupela opis

Paulus Tali i raitim

WANPELA ogenaisesen i save givim gutpela stia na tingting long ol yut bai kisim opis long karimaut gut wok bilong em.


Yut Egens Korapsen Asosiesen (YACA) bai kisim nupela opis insait long bikipela opis we nau [TIPNG] Trensperseni Intesenei i stap long en insait long Mosbi siti.

Insait long dispela opis bai ogenaisesen i strongim ol yut aninit long wanpela progrem we Katolik Pater John Glynn i bin kirapim long helpim ol yut long kisim gutpela stia bai kantri i ken i gat gutpela taim bihain.

Pater John i gat bikipela wari long ol pasin olsem korapsen o pasin bilong ol lida long stilim na yusim kranki pablik mani, giaman na stil pasin we i wok long bagarapim pipel na kantri.

Pater John em i saplen, kaunsela na tisa long Jubili Katolik Sekonderi skul long Hohola, Pot Mosbi.

Long yia 2002, em bin kirapim dispela ogenaisesen long Jubili yet. Ol narapela skul olsem De La Salle Bomana, Hohola Yut Developmen Senta, Yunivesiti of PNG na ol arapela sapota i kamap memba bilong YACA.



YUT PAWA: Pater John Glynn i wokim bikipela wok long stiaim gut ol yut long kamap gutpela lida.

Long liklik strong bilong em yet, Pater John husat i stap longpela taim nau long PNG i wokim samting long helpim ol yut, olsem na em i statim YACA na em i skruim wok long skul yet.

Pater i lukim olsem i moabeta long skulim ol pikinini long luksave na abrusim na daunim ol pasin nogut olsem korapsen, tok gris na tok giaman taim ol i liklik yet.

Nupela opis bai helpim YACA long karimaut gut ol wok bilong sapatim ol yut.

Pater John i tok em bai go het long sapatim dispela wok long wanem nau yet i nogat

opis na planti wok bilong yut i no ron gut tumas.

Ol eksekutiv bilong yut bai go hetim wok olsem ol fultaim wok-

man long ronim ol wok, Pater Glynn i tok.

Immanuel mama strongim wok poroman

Paulus Tali i raitim

WOK poroman namel long ol mama bilong Luteran Sios i bin kamap strong moa yet taim tupela grup i bung wantaim long sea, pre na mekim wok misin wantaim.

Bihainim tok bilong Aposel Santu Paul olsem husat i bungim hevi, ol lain i strong i mas helpim na strongim ol, samting olsem 50 Luteran mama bilong Imanuel distrik long Pot Mosbi na ol wanlain bilong ol long Imanuel Distrik long Hailans i bin bung

wantaim long Pot Mosbi na karimaut wok misin long Towamo, Koli na Marimari kongriksen.

Dispela wok poroman misin namel long tupela distrik i bin stap bipo tasol i no go gut long sampela yia na nau tasol ol meri bilong Hagen Imanuel Distrik i laik kirapim gen

dispela wok bung na 26 mama olgeta i bin kam long Mosbi na stap long wanpela wik.

Long wokabaut bilong ol, ol i givim Baibel stadi na tokaut long laik testimoni bilong ol yet we Jisas i

kam long laip bilong ol na helpim ol.

Rinah lrk husat i go pas long ol Hagen mama i bin autim tok amamas long gutpela lukaut long ol mama long Papua Distrik i givim ol na tu, sapot bilong hetman bilong Koki Luteran Sios Isaac Theo na ol lain bilong Sauten na Westen Hailans.

Em i amamas long gutpela wok bilong ol mama long Papua Distrik na tingting na save ol i kisim long Mosbi bai helpim ol long karimaut wok bilong ol taim ol i go bek.



JISAS I SORI LONG OL MANMERI

Jisas i go raun long olgeta taun na ples. Em i skulim ol manmeri insait long ol haus lotu bilong ol. Em i autim gutnius bilong kingdom bilong God, na em i mekim orait olgeta kain sik i stap long bodi bilong ol. Em i lukim ol bikipela lain manmeri, na em i sori tru long ol, long wanem, tingting bilong ol paul nambaut, na ol i stap nogut tru, olsem ol sipsip i nogat wasman. Olsem na em i tokim ol disaipel bilong en olsem, "Planti kaikai tumas i mau pinis long gaden, tasol i nogat planti wokman i stap long kisim. Olsem na yupela i mas beten long Papa bilong gaden, bai em i salim ol wokman i go bungim kaikai bilong en."

MATYU 9: 35-39



WOK POROMAN: Ol mama i redi long karimaut wok.

GLASIM TOK



wantaim

BISOP PETER FOX

Autim Tok Tru i bikpela samting

JISAS i tok," sapos yu bihainim tok bilong mi, yu disaipet tru bilong mi na bai yu save long tok tru na tok tru bai oraitim yu." (John 8: 31-32)

Antap long ol narapela samting, ol Kristen manmeri i mas autim tok tru olgeta taim.

Sapos yumi no tok tru, wanem hop bai ol arapela i gat?

Lod na Masta bilong yumi i bin go long Diwai Kruse na as em long tok tru.

Olsem em i bin tokim Pailot "Mi kam long dispela wol long dispela, long bringim witness long tok tru." (John 18: 37)

Santu Paul i tokim yumi olsem yumi mas autim tok tru wantaim laik pasin long wanpela narapela. (Efesus 4:15). "Olsem, na yumi lusim ol giaman samting na yumi tok-tok long trupela samting wantaim ol neiba bilong yumi. (Efesus 4:25).

Tasol em i hat long tok tru. Long luksave long ol narapela i tokim trupela samting long yumi i hatpela moa. Wanem nau i trupela samting long ol sios long PNG?

Planti manmeri i save go long ol sios sevis, tasol ol Baibel, ol singsing na ol preia buk bilong sios na ol man i save yusim long taim bilong lotu i save lus nating.

Ol manmeri i wok long yusim bilong singsing long en em ol i stilim.

Sampela sios i save gat bikpela Ista kendel we ol i save blesim long Ista taim bilong yusim long taim bilong Baptismo.

Planti taim, Pentekos i kam, Ista kendel ya i lus pinis. Sapos ol i no stilim, ol i putim gut long ples i gat lok long em, nogut sampela lain i stilim.

Dispela i klia olsem sampelpa kongriksen memba bilong yumi i lotu, singsing tasol ol dispela i no karim wanpela mining long ol.

Ol i ting olsem Kristieniti em i samting bilong wokim ol gutpela toktok tasol long lewa stret bilong ol, ol i nogat bilip long ol.

Jisas i bin gat tok lukaut long ol dispela kain mauswara Kristen.

"I no olgeta lain i save tok olsem long mi, "Lod, Lod " bai kam insait long Kingdom o ples heven, tasol ol dispela i save bihainim na inapim laik bilong Papa bilong mi long Heven." (Matyu7:21)

Yumi stap long kantri we nogat samting i stap hait.

I nogat windua long haitim ol saun na olsem nogat samting bai yu wokim i stap hait.

Sapos tupela pipel i kros pait, olgeta manmeri long ples bai harim.

Tasol taim samting nogut i kamap long ol pikinini, man i paitim meri na sampela lain i reipim o bagarapim ol yangpela meri, i luk olsem nogat man i harim.

I tru yumi yaupas long harim hevi bilong ol narapela?

Long tokaut long trupela samting i ken hat, tasol trupela samting bai larim mipela i fri.

Odinesen pulim planti tausen pipel

YONGOMUGL pipel insait long Simbu provins i bin lukim namba wan pater bilong ol taim wanpela pikinini man i kisim blesing long kisim dispela wok.

Mai peris na sios i bin pulap kapsait taim moa long 8,000 pipel i bung long witness odinesen bilong Peter Kerenga i kamap wanpela SVD pater. Ol pipel i bin kam long olgeta peris insait long Simbu na tu, long ol longwe ples olsem Mosbi, Madang, Goroka, Lae na Hagen. Trupela wok bung namel long ol sios i bin kamap taim ol Luteran, ol Pentekostel na Seven de Ewentis lain i go insait long dispela selebrenen i no long taim i go pinis.

Bisop Henk te Maarsden SVD bilong Kundiawa Daiosis taim em i givim toktok i bin strongim ol Yongomugl pipel long sapotim nupela pater na em bai karimaut gut wok bilong em.

Em bin skruim tok moa long fetman bilong Katolik Sios long wol, Pop Benedict 16 husat i gat bikpela laik long ol wan wan daiosis long PNG.



NAMBA WAN YONGOMUGL: Hauslain i givim nupela Pater Peter long han bilong Bisop Henk SVD.

Na long wokabaut bilong ol bisop bilong PNG i go long Rom, em bin putim askim i go long wan wan bisop, pater, dikon na ol manmeri nating bilong karimaut evanjelais-

esen o autim Tok bilong God na mekim ol asples sios insait long ol komyuniti i kamap laip insait long Kraus.

Peris pris bilong Mai em Pater Anton Bai i bin salensim ol Yongomugl pipel long noken askim long moa pater i kam long ausait tasol long salim ol pikinini bilong ol yet i go skul seminari na ol bai kamap pater na sevim ol.

Bikpela kaikai i bin kamap we ol bin kilim na redim long dispela seremoni planti pik, tupela kau na ol arapela kaikai moa. Ol bin givim planti mani tu olsem ofa long dispela selebrenen.

Ogenaisng komiti memba Dama Damine taim em i tok tenkyu long olgeta lain long sapot bilong ol i bin tok bikpela samting em long kirapim narapela donesen yet bilong sapotim ol asples pater long ol ministri bilong ol.

Maski ren i bagarapim rot na i tais, olgeta lain i bin amamas long witness odinesen long namba wan pikinini bilong ol na ol bin go bek long ples wantaim bel amamas.

Poroman sios progrem kamap strong

POROMAN namel long Luteran Sios long Gemeni na PNG i go strong moa yet wantaim tripela kongriksen insait long Mosbi na wanpela long Gemeni i kirapim progrem long raun lukim wanpela narapela.

Gerehu Luteran, Emanuel na Kirap Bek Luteran kongriksen insait long Nesenel Kapitel Distrik i wok poroman wantaim seket bilong Donauworth Luteran sios long Bavaria, Jemeni. Na olsem hap bilong wok poroman namel long ol, sampela sios seket memba i bin kam lukluk raun long PNG long dispela yia na tu, long ol yia i go pinis.

Bai i gat bekim bilong em taim sampela lain bilong tripela kongriksen long NCD i mekim wokabaut i go long Gemeni long

yia 2007. Tru, dispela wok poroman i bin stat long 1980 tasol wok i no bin kampa klia inap long 1997 taim seket presiden Reveren Rainhard Feurd i bin kam lukluk raun long tupela kongriksen. Long Julai Ogas bilong 1999, ol bin salim 6-pela lain gem i kam lukluk raun long PNG.

Long dispela yia, grup i bin raun i go tu ausait long Mosbi.

Siaman bilong Dinaworth kongriksen Rolf Eukhardt i bin go pas na grup i go long Lae, Mumeng, Kainantu na Madang. Na ol i amamas tru long lukim ples na tu, kaikaim ol ples kaikai.

Aninit long progrem, Nalau Nathan em siaman bilong Kirap Bek kongriksen i bin go long Donauworth, Jemeni long yia

2001. Em i tok poroman i gutpela samting tru bikos ol i lukim ol narapela olsem ol poroman brata na susa na ol wantok.

Na em i salim bikpela tok tenkyu i go long Evanjelikel Luteran Sios long Gemeni na PNG Nesenel Sios Kaunsel long stretim ol toktok na kamapim dispela kain rot we ol Kristen manmeri husat i nogat biknem inap go long ol ovasis kantri na lukim ol Poroman sios memba.

Em i tok long 2007, 4-pela kongriksen memba bai i go long Gemeni aninit long Poroman sios progrem long askim bilong pren sios bilong ol.

Liklik manki Simbu autim tok

WANPELA liklik manki Simbu i gat 12-pela krismas i mekim wok misin insait long Lae na pulim planti manmeri long harim em.

Em i no isi long autim Tok bilong Baibel long strit na taun eria insait long Simbu na nau em i wokim wankain long Lae siti.

Papa bilong manki em i wanpela katekis long Katolik Sios.

Long ol ripot, Papa God i yusim dispela liklik manki long gutpela wei tru taim papa bilong em i wanpela katekis long Katolik Sios long Simbu.

Ol ripot i tok planti pipel i save bung na ol i laik tru long harim ol toktok bilong em.

Ripot i tok manki i no save holim wanpela Buk Baibel taim em i autim tok, tasol em i save long olgeta Tok long Baibel we Papa

God i planim pinis long het bilong em.

Em bai go long sampela arapela hap bilong kantri long mekim wok misin bilong em.

Ol lain bilong Madang na Wewak bai gat sans bilong ol long lukim na harim dispela manki taim em i pinisim wok misin long Lae na go long hap bilong ol.

Wanpela bikpela toktok em i autim em long ol pipel i mas tanim bel, lusim pasin nogut na bihainim pasin Kristen.

Dispela boi i soim gutpela piksa long komyuniti long wanem taim manki i stat liklik yet na i pas wantaim God dispela kain pasin bai i stap yet wantaim em taim em i kamap bikpela. Maski sapos em i go krangki sampela taim dispela pasin bai kisim em i kam bek long gutpela wei.



WOK MISINARI: SVD Pater Stephen Simangi bilong PNG wantaim tupela perisina long Brazil we em i mekim wok misinari i stap.

TOK LUKAUT



wantaim

DAVID EPHRAIM

LUKLUK i go insait long kirap bilong HIV/AIDS i kam inap long nau yumi ken luksave moa olsem HIV/AIDS i kamap bikpela pinis long kantri bilong yumi.

Planti taim yumi save sutim tok long ol rot meri i save salim skin long slip wantaim narapela long kisim mani.

Yumi save ting olsem HIV/AIDS em asua bilong ol sin manmeri tasol. Olgeta taim yumi save sindaun na toktok long kamapim wok bilong senisim pasin nogut bilong ol manmeri tasol yumi i no save wokim.

Long bipo yet i bin gat wankain samting olsem HIV i bin stap long taim Jisas i bin kamap long graun na wokim wok bilong en. Long dispela taim i bin gat wanpela sik ol i kolim long leprosi o sik tomato i bin bikpela tru. Na taim manmeri i kisim orait ol i save go ausait na stap long ples i nogat ol arapela manmeri i stap long en. Ol tu i save kisim bikpela sem long wanem ol gutpela manmeri i save kolim ol sin manmeri. Dispela em wankain tasol long HIV/AIDS tude. Planti bilong yumi i save bagarapim stret ol lain husat i gat HIV binantang.

Insait long dispela, Gavman i luksave long lo we bai kisim manmeri husat i tok nogut o bagarapim ol lain husat i gat HIV i go long kot. Tasol planti manmeri i no save gut long dispela lo we gavman i sanapim.

Sapos yu laik save moa long dispela lo orait ringim ol lain long Nesenel AIDS Kaunsel long 323 0166 o rait i go long ol long National AIDS Council Secretariat PO BOX 1345. Boroko. National Capital District.

Taim yu rait yum mas putim leta bilong yu i go long legal etvaisa bilong AIDS Council.

O yu ken go lukim ol Provinsel AIDS Kaunsel i stap klostu long yu.

I gutpela sapos yu traim lainim planti samting pastaim long yu kirap nogut olsem yu tu yu brukim lo.

HIV/AIDS i stap pinis. Tingim, lo i luksave pinis long stap bilong en.

Tok Stia

Sapos yu gat HIV binatang bai yu mekim wanem? Sapos yu bin save olsem pasin bilong i ken givim yu dispela binatang bai yu mekim wanem?

Yes HIV i stap pinis yu na mi mas save olsem yu ken helpim long daunim dispela binatang.

Rot bilong senisim pasin em i stap long pasin bilong lainim o pasin bilong askim na save.

Planti taim yumi save ting olsem ol AIDS Council tasol i ken helpim long yumi senisim pasin bilong yumi. Bikos yumi save lukim planti kain stail aweanes long TV na radio.

Yes Wantok, planti aweanes i kam na yu save lukim na ridim. Tasol sampela bilong yumi i no save bihainim. Long tok aut stret em olsem nau dispela mak we HIV/AIDS i ron long en, i luk olsem long Afrika we planti i dai pinis na nau yet manmeri i wok long dai yet taim yu ridim Wantok Niuspepa nau ya. Wanpela insait long wol i wok long dai bikos HIV binatang i wilwilim strong i bilong bodi bilong en taim ol kain kain sik i kisim em trangu em i dai tasol.

Long kantri yet dispela wankain olsem i kamap long Afrika i spid o strong bilong ron bilong HIV i stap nau stret.

Long tokim yu klia stret. Yu mas senisim pasin bilong yu taim i kam long seks. Sapos yu manmeri we i no nap bihainim strepela pasin Kristen orait. Ol dokta i tok gumi em wanpela rot bilong stopim dispela binatang sapos yu yusim gut.

Namel long dispela yu mas tingim laip bilong yu i no stap long han bilong gumi o Nesenel AIDS Kaunsel, nogat. Laip i stap long han bilong yu yet.

Tingim tude na senisim pasin bilong yu nau bipo yu kirap nogut.

HIV/AIDS stat long groim strong lek bilong en insait long kantri. Nau yumi mas rausim em nau!

Edukesen sistem i gat salens



REDI LONG SELEBRET: Yumi gat salens long sapatim skul bilong ol pikinini.

SALENS bilong Edukesen sistem long dispela kantri em long olgeta pikinini i go long skul aninit long kurikulum i sut stret long kain sindaun bilong PNG we bai helpim ol sumatin long kisim save, gutpela pasin na helpim ol yet long laip na sindaun bilong ol.

Ekting Edukesen Seketeri Joseph Pagelio i tok taim PNG i redi long selebretim namba 30 independens aniveseri long tupela wik i kam.

Em i tok tru, kantri i

gat 30 krismas, planti wok kamap na gutpela samting i kamap long eria bilong edukesen.

Em i tok yumi mas praut olsem edukesen sistem bilong yumi i kamapim planti lain i go long ol bikpela skul na kisim save. Na ol i wok olsem ol pailot, enjinia, saientis, rises lain na dokta ovasis.

Em i tok edukesen sistem i skulim moa long wan milien sumatin long 8,000 skul, kolis na Yunivesiti na 34,000 tisa i skulim ol.

Em j tok wantaim nupela edukesen rifom,

senis long kurikulum na 10-pela yia Nesenel Edukesen Plen 2005-2015, sistem bai lukim gutpela senis.

Na em i tok edukesen sistem i givim bikpela sapat long ol pikinini meri i go long skul na gat wankain sans olsem ol pikinini man.

Salens nau i stap long han bilong ol tisa, papamama, sistem na ol pikinini long wok wantaim na givim gutpela skul long ol pikinini na wantaim save long akademik sait, gutpela pasin ol i ken mekim samting long sapatim ol

yet na kontribuit long developmen bilong kantri.

Taim Dokta Pagelio i toktok long ol gutpela samting i kamap long edukesen we yumi ken amamas long en, em i tok tu long luksave long ol wari na hevi i stap.

Bikpela em planti pikinini i lusim skul bipo long Gret 8 na tu, hevi long spes long ol teleri institusen na kolis. Narapela em HIV/AIDS we i bikpela developmen hevi na Edukesen Dipatmen i luksave long em na i wok long kamapim wanpela polisi

plen long putim dispela i go insait long ol progrem bilong em.

Dokta Pagelio i askim olgeta skul sumatin na pipel long kantri long amamasim 30 yias aniveseri wantaim tingting olsem "wanpela pipel na wanpela kantri".

Em i tok yumi mas amamas long ol wok kamap yumi gat na wok hat moa wantaim long daunim ol hevi, yusim gut ol risos yumi gat long em na go fowet long kamapim gut yumi yet, ol famili na kantri.

A COLLEGE TO CHANGE YOUR WORLD IN 2005 **YOUR accredited international awards**

Invest in accredited qualifications and skills to gain a successful career. Everything you need for study success is provided; Training Materials, Guide, Exams, Revision Tests, Exam, Award.

Diplomas (£150/US\$300/AUS\$360)

- *Accounts, Hotels, Tourism, Computers
- *Business, Management, English, Stores
- *Personnel, Office, Purchasing, Advertising
- *Marketing, Insurance, Secretary, Office
- Advanced Diplomas, BBA, BCom, MBA**
- *Business, Marketing, Finance, Organization

For a FREE Prospectus/brochure contact:

CAMBRIDGE INTERNATIONAL COLLEGE
P.O. Box 1378, Southampton,
SO17 3WX, Britain

Web: www.cambridgecollege.co.uk
email: info@cambridgetraining.com
Fax: +44 2380 337200

Accredited British Training & Education registered with the National Training Council & Ministry of Labour of Papua New Guinea

Ol Yunivesiti sumatin laik pait agensim AIDS

Jeffrey Epeli (DWU sumatin) i raitim

AIDS I KAMAP bikpela hevi long kantri na pipel i mas wok bung wantaim gavman long pait agensim

Vais Presiden bilong Nesenel Yunien bilong ol Sumatin (NUS) Botu Egai i bin autim dispela tok long wanpela HIV/AIDS konferens bilong ol Teseri institusen o yunivesiti skul we i bin kamap long Divain Wod Yunivesiti long Madang las wik.

Het tok bilong konferens em "Unified Towards Action: The Battling of HIV/AIDS" na ol lain i makim ol bikpela institusen i bin stap long bungim ol tingting na painim rot bilong helpim daunim dispela sik i kamap bikpela hevi long olgeta eria bilong laip na developmen.

Save olsem HIV/AIDS i stap pinis long kantri na i kamapim hevi long olgeta eria bilong laip, wok, skul na developmen, ol skul na edukesen institusen long kantri i go insait nau long pait bilong daunim.

Mista Egai i tok NES em i wanpela bodi i stap pinis na i makim olgeta bikpela Yunivesiti long kantri na gavman i ken yusim long kisim infomesen long HIV/AIDS i go aut long ol pipel.

Em i tok sapos gavman i ken luksave long wok ol sumatin i ken mekim long daunim HIV/AIDS na i no lukim NUS olsem birua grup, ol i ken wok wantaim long pait daunim sik nogut ya.

Em i tok sapos pipel i nogat save long dispela sik, em bai go bikpela yet. Na ol sumatin wantaim skul na save ol i gat i ken helpim long kari-maut ol wok aweanes long dispela.

Em i tok wok rises na projek i bikpela samting long helpim daunim HIV/AIDS we i ken helpim, na i no wok kempin tasol.

"HIV/AIDS em i bikpela hevi tru inap long bagarapim kantri. Tasol nogat man bai mekim ol samting i kamap long daunim. Em i wok bilong ol pipel na kantri long wok bung na pait egensim dispela sik long kantri.

Leik Kopiago eria i no kisim helt sevis

SINGAUT i go long Nesanel Gavman na Provinsel Helt Dipatmen long sekim wok bilong ol helt opisa long Leik Kopiago eria insait long Sauten Hailans bikos planti sik nogut i kamap long hap.

Em ol sik olsem malaria we i wok long kilim dai planti pipel. Narapela em bel i pen we i kilim dai pinis 6-pela pipel long dispela mun.

Dispela i soim olsem helt sevis i no go long ol pipel long dispela eria.

Ripot i bin kam long Pasto Daniel Numaya, wanpela pasto (gat nem bilong em) bilong Kristen Bratahut Sios (CBC) husat i wok insait long Leik Kopiago eria.

Pasto Numaya i bin witnesim dispela kain dai bilong ol pipel na em i tok olsem ol pipel i sot tru long marasin na i wok long dai nating tasol.

Em i tok rot na bris long dispela eria i bagarap tru na olsem, em i hat long ol

....6-pela dai long sik bel pen

manmeri i go long bikpela haus sik na kisim helpim.

Pasto i tok olsem em bin lukim bikpela hevi i wok long kamap long hap eria we em i wok long em.

Em i tok ol pipel i save tuhat long painin rot bilong ol yet i go long ol bikpela haus sik olsem Hagen o Kunjib long kisim marasin bilong ol na famili.

Pasto 1 sori tru long lukim ol pipel i bungim hevi olsem na ol i laikim rot bilong kisim gutpela sevis. Em i tok planti semis i no go gut insait long dispela distrik bihain long 30 krismas PNG i kisim independens.

Em i tok moa tu olsem bihain long 30-pela krismas, ol kain gutpela semis olsem helt na edukesen i wok long bagarap na askim husat nau bai givim sevis i go long

ol pipel?

Taim em i singaut long gavman na Provinsel Helt seksen long sekim ol wok-lain bilong helt long Leik Kopiago, em i tok "ol helt opisa bilong liklik distrik i holim namba tasol nogat wok i kamap".

Ripot i tok tu olsem Tari Distrik opis i pas na em i askim long wanem as tru dispela i kamap.

Em i tok provins i gat planti risos na Tari distrik opis i mas op bek gen long sevim ol pipel long wanem kain ol hevi ol i gat long em.

Ripot i tok ol pipel i laikim gutpela sindaun na ol i laikim helpim bilong ol Non Gavman Ogenaisesen olsem Pis faundesen Melanesia bilong go insait na kari-maut wok long helpim ol.

Edukesen Dipatmen kirapim Odit Komiti

EDUKESEN Dipatmen i wok long kamapim gut ol samting insait long Dipatmen na ol skul long helpim ol wok i go gut.

Olsem hap bilong dispela, Dipatmen i bin lonsim o kirapim Odit Komiti bilong sekim ol wok mani we Dipatmen i yusim long ol wok bilong em.

Odita em ol lain i save sekim buk long rot we man, kampani o ogenaisesen i yusim mani long em.

Ekting Edukesen Seketeri Dokta Joseph Pagelio i tok kamapim Odit Komiti bai helpim strongim gutpela gavanens o gutpela lukaut na stia

na sapot long ol Intenel odita long wok bilong ol.

Ol komiti memba em Siaman James Kerwin husat i Deputi Seketeri bilong Polisi wantaim Fainens Dipatmen, Pona MacKawa husat i Deputi Odita Jenerel na Dokta Pagelio yet. Bai ol i kisim tupela moa memba ausait long Dipatmen.

Mista Kerwin i tok ol i kirapim dispela komiti em i wanpela rot long kamapim nupela samting long kantri na as em long inapim Pablik Fainens Menesmen Ekt aninit long Seksen 9 @- Intenel Odit na Odit Komiti Fansen.

Em i tok sampela gutpela samting we komiti bai kamapim em long kamapim long ples klia ol samting i sut long ol odit wok na bekim bilong menesmen long dispela, kirapim ol tingting, sapotim menesmen na Intenel odit na tu skelim na glasim ol wok bilong menesmen tasol i no kisim wok bilong em.

Mista Kerwin i tok komiti bai i no kisim ples o sait bilong menesmen tasol em i wanpela independen komiti bai makim ol pipel bilong PNG.

"Gavman i tingting long kamapim gut ol sevis long ol

rurel eria wantaim ol risos em i gat. Taim ol risos i lus o tro-moim nating o lus bikos ol i stilim o yusim nogut, em i min olsem ol rurel eria i no kisim gut sevis," Mista Kerwin i tok.

Dokta Pagelio i tok ol i gat plen long kisim i go insait "Integretet Korapsen na Prod Privensen Strateji" o plen bilong stopim korap na stil pasin.

Dispela, em i tok, bai kamapim gutpela wokples we i wok i gat ol lain i no wokim hait pasin bilong stil na paulim na yusim kranki mani.

Tripela Sepik skul kisim TV satelait dis ...Bai helpim skruim save

EDUKESEN Dipatmen i wok long strongim ol praimer skul long kantri long putim ol Televisen skul program long program bilong ol.

Dipatmen i bin givim dispela toksave insait long wanpela sekula o pas bilong Seketeri namba 8/2005 bilong de 1/2/05.

Las mun, Kurikulum Developmen Divisen i bin putim tripela TV satalait dis long tripela praimer skul insait long Is Sepik provins. Em long Wallis, Dagua na Balik Praimeri skul.

Edukesen Dipatmen yet i bin baim na putim ol dispela long helpim ol i pulim gut EMTV signal na tripela skul ya i ken kisim gut ol TV program i sut long rifom.

Ol dispela program em long Gret 6

Pesnel Developmen, Gret 7 Sosel Sains na Making a Living na Gret 8 Sosel Saiens.

Gavman bilong Japan i bin givim ol antena bilong TV i go long tripela skul long 2003 aninit long JICA, em sapot program bilong gavman bilong Japan insait long wanpela pilot projek bilong em. Aninit long pilot program bilong JICA, ol skul i wok long kisim ol TV program tasol i no klia tumas. Olsem na ol dispela satalait TV dis bai givim bikpela helpim.

Tripela skul wantaim ol tisa, ol sumatin na komyuniti i bin amamas tru long kisim ol dispela samting na tok em bai helpim kamapim gut lainim na save bilong ol pikinini long ol sabjek i stap long nupela edukesen kurikulum.

AusAID helpim Nes Digri program

Frank Asaeli long UPNG i raitim

NESING Digri kos long Yunivesiti Marasin skul i wok long kisim helpim long raitim program bilong em.

Insait long las 5-pela mun, 5-pela nesing konsalten bilong Monash Yuniveiti long Australia i wok long helpim UPNG Skul bilong Marasin na Helt Saiens i raitim Basela of Nesing program.


AUSAID i givim mani inap long K500,000 aninit long PNG Insentiv Fan aninit long sapotim dispela wok.

Bosman bilong UPNG Marasin Skul Dokta Mathias Sapuri i tok as tingting bilong dispela projek em long helpim kamapim strong nes trening na ol skul bilding long kempus

Em i tok AusAID aninit long PNG Insentiv Fan bai tromoim K7.8 milien long sanapim nupela bilding long Taurama Marasin Skul Yunivesiti kempus na long sapotim tu ol akademik program i sut long kamapim ol distens trening skul.

Nes trening pastaim i bin stap aninit long Kolis bilong Alait Helt long 1974 inap long 1999 na bihain, ol bin kisim i go insait long Yunivesiti ov PNG skul.

Dokta Sapuri i tok trening bilong ol helt woklain i wok long tenis tasol mani i sot n dispela hevi tasol i mekim na ol program i no go het olsem ol i laikim long em.



STRONGPELA SAPOTA:

Sue Darby em i wanpela gutpela sapota bilong Open Hat Operesen i selebretim namba 60 bonde long tok gutbai dina bilong ol dokta na nes i bin wok wantaim long operesen long Pot Mosbi Jenerel Haus sik.

Foto: NICKY BERNARD



Salim ol pas i kam long WANTOK NUSPEPA: P.O. Box 1982, Boroko N.C.D 111 Fax: 325 2579 Email: word@global.net.pg

MSG mas luksave long West Papua

Dia Edita

MI RAIT long soim bikpela bel kros bilong mi long ol top opisa bilong Melanesia Spia Het Grup husat i pasim dua long lida bilong West Papua Mista Otto Ondowame.

Ol kain man olsem Sir Rabbi Namaliu na ol sampela ol narapela ol politik manmeri. Dispela kain pasin yupela i wokim long lida bilong West Papua em i wanpela bikpela pen we mipela ol Papua Niugini i pilim insait long lewa. Sapos yu gat wanpela liklik brata ol i adoptim na i stap wantaim narapela famili tasol ol i no save lukautim em gut, yu no inap sori long em?

West Papua ol i gat kalsa em i pas wantaim yumi Papua Niugini. Em i min yumi brata na yumi gat wanpela pasin na wanpela papamama. Bilong wanem yumi pasim ai na givim baksait long ol? Mi ting olsem Melanesia Spia Het Grup yupela i gat rait long toktok long problem bilong Melanesia pipel long West Papua. Bikos em ol Melanesia pipel ol i sindaun wantaim problem na wari. Husat Papua Niugini manmeri yu laik sapatim, mi amamas long ritim pas bilong yu.

WARREN JOSH KIMBE WES NU BRITEN PROVINS

Tingting gut na raitim pas

Dia Edita

GIVIM mi liklik spes na mi laik bekim pas bilong brata ya, Albert Tonny bilong Kimbe. Albert, yu bin toktok long noken autim tok bilong God long maket ples.

Em yu rong long toktok olsem. Yu mas save olsem Jisas long taim em bin i stap long graun em bin autim tok long maunten, nambis, maket, haus lotu na wanem liklik hap em wokabaut long em na autim tok. Sapos yu man bilong ritim buk Baibel bai yu save gut na yu no inap toktok olsem. Moabeta, mi laik tokim yu long glasim Baibel gut na yu raitim pas.

Em tasol liklik toktok bilong mi. Sapos yu no wanbel long toktok bilong mi orait rait tasol kam na bai yumi skelim.

LOLO BEN MADANG

Tok aut tasol long PNG, wanfamili

Dia Edita

PLIS givim mi spes long tokaut long luksave tasol. Nau yumi kisim hat taim tru. Hevi bilong bagarapim na kilim manmeri, hevi bilong kain kain sik, hevi bilong bagarapim siti taun na ples long kain kain rot i kamap long pikinini na papamama wantaim. Hevi long laikim moa mani long hait tingting bilong memba na minista bilong gavman long lukautim meri, pikinini bilong ol yet na lus tingting long yumi olgeta wanfamili bilong Papua Niugini.

Yumi no save long narapela sait olsem Australia, Amerika, Nu Silan, Malenesia na ol arapela kantri i stap long wanem kain sindaun. Ol wait man i painim yet olgeta Niugini wantaim long 200 yia 1400-1600, tasol yumi pulap long pasin bilong sakim tok, pasin bilong stopim rot bilong waitman wantaim klinpela pasin i kam long Niugini i stap longpela taim i kam abrusim 1900 na ol saveman bilong narapela kantri i kam stretim kantri bilong yumi. Olsem wanpela liklik diwai groa kam antap long gutpela graun, kisim gutpela wara na klinpela win na as bilong em i kamap naispela na kamap ples bilong bel isi na malolo. Tasol em i no bikpela yet na han bilong em i lus lus, na planti pipia pulap long dispela hap ples na i nogat wanpela man i fit long klinim dispela pipia. Tasol olgeta hetmanmeri na papa, mama, pkinini wantaim klinim dispela pipia, bai oraitim groa gen bilong dispela diwai.

Dispela em wei bilong yumi Papua Niugini stret. Ritim na mekim wei wantaim gutpela tingting na bel isi tasol.

PETER TILINI LAE MOROBE PROVINS

Nogat redio FM 100, 96, 93 brodkas long Is Sepik

Dia Edita

MI WANPELA pikinini Sepik nau yet em mi kam stap long Pot Mosbi siti. Mi laik autim sampela toktok i go long memba bilong Is Sepik provins. Long lukluk bilong mipela pipel olsem, nogat gutpela developmen i go insait long Wewak, Is Sepik provins. Olgeta taim mi save lukim TV, harim long redio na lukim long niuspepa, sampela hap bilong provins i wok long develop i go nau olsem na senis tu i wok long kamap nau. Mipela yet long Is Sepik nogat stret. Tru olsem taun i klin tasol nogat gutpela senis i kamap. Yupela ol memba bilong Is Sepik provins

nogat luksave long provins bilong yupela. Mekim na provins olsem wanpela olpela gaden bus karamapim pinis long en. Bilong wanem Is Sepik provins i no kisim redio stesin olsem FM 100, FM 96 na Fm 93. Long wanem as tru Is Sepik i no kisim dispela ol redio stesin?

Olgeta hap long provins ol kisim wailis stesin na i gat sem olsem Is Sepik yet i no kisim ol dispela redio stesin. Plis mipela tu man yah, noken kalabusim mipela. Larim na mipela tu amamasim mipela yet wantaim ol kain redio stesin olsem. Luk olsem ol bikpela redio

mipela baim long em i nogat wok bilong ol nau. Ating bilong harim kaset i pilai tasol. Nogat gutpela luksave long as ples provins olsem na ol Sepik pipel i sindaun long olgeta hap kona bilong kantri. Wanem hap yu go luk olsem Sepik i stap. Plis ol memba luksave nau long putim redio stesin i go insait long provins.

Em tasol na husat bratasusa i laik strongim o agensim toktok blong mi, welkam tasol. *Wantok Niuspepa* em stap.

SEMEX CHARLES POT MOSBI NCD



Toksave! Sampela ol pas mipela i kisim i longpela tumas na i no givim spes long ol arapela pas, plis raitim liklik pas. Na tu putim nem na adres bilong yu long olgeta pas yu salim i kam, tenkyu. - Edita

Madang kot haus i nogat senis

Dia Edita

MI RAITIM dispela pas long autim wari bilong mi olsem het tok i stap antap.

Tru mi no bilong Madang, tasol mi save laikim Madang taun na ol pipel bilong Madang, long wanem mi bin kisim bikpela skul bilong mi long Madang na oltaim sampela samting i save go rong o i gutpela, mi save rait long *Wantok Niuspepa* na putim wari na ol man i save ritim.

Orait wari bilong mi go olsem, mi sori tru long lukim dispela tupela liklik haus kot long Madang i wok long kamap bagarap na nogat ol senis long stretim gut haus kot we bai dispela haus kot i mas kamap gut long ai bilong publik olsem em haus kot.

Dispela haus kot long Madang i mas stap samting olsem 35 o 36 yia bikos long 1973, mi bin sanap long dispela kot haus long givim medikol ripot long tupela ka birua we sampela lain i dai.

Dispela taim mi stap treni na mi ting dispela haus kot bai senis long sampela yia i kam tasol nogat. Dispela tupela binatang haus kot i sanap yet na mi ritaila o pinis ken olsem wok bilong mi long publik sevis long dispela yia.

Aste tasol mi kam raun ken long Madang na mi lukim ken dispela tupela haus kot na mi wari tru.

Tupela haus ya i luk olpela tru na i gat sampela bruk bruk long ol faibro wol na ol man i sindaun arere long ol haus kot na spetim buai long ol graun arere long kot haus.

I nogat sekyuriti o banis long banisim kot haus. Mi pilim olsem ol pipel long Madang i no moa rispektim kot haus i olsem wanpela haus we ol bikpela kot i save kamap long stretim wari bilong ol pipel.

Mi no save nau, rong i stap we. Nesenel Gavman, provinsel gavana o ol nesenel memba. Madang i save kisim bikpela win mani i kam long ol bikpela kampani nau i stap long Madang olsem Jant Co, James Barnes, Britis Ameriken Tobako, tinpis fektori, bikpela turis indastri na ol bisnis haus.

Dispela ol dispela mani em provinsel gavman i save kisim long tripela 10 yia i go pinis i go we? Yupela yet nau. Ol pipel long Madang - noken pasim ai.

ARNOLD AKE VANIMO SANDAUN PROVINS

Noken yusim nem bilong God long tok pilai Kanage

Dia Edita

MI BIN ritim olsem planti man ol i save yusim nem bilong God long tok pilai wantaim Kanage.

Dispela ol man i nogat spirit bilong God bilong soim God em i olsem wanpela paia i save kukim olgeta samting [Heb 12:29]. Nem bilong God em i bikpela nem tumas, [Deut 28:58] na antap tru [Pil 2: 9].

God em yet i holi tru na nem bilong em tu i holi na em i holi nem bilong holi God i stap long Holi Ples bilong em long heven antap tru [Is 57:15]. Lo bilong God em i tambu tru long kolim nating Holi nem bilong em [Ex 20:7].

Bel na tingting bilong ol dispela man i pulap tru long kainkain sin, na mekim ol yet i kamap doti tru long ai bilong God [Mk 7:21-23].

Ol i save wokabaut long pasin bilong olpela bel, na ol olpela bel i laik kaikai olgeta sting samting na blokim ol yet i stap ausait long Kingdom bilong God [Gal 5: 19-21].

Maus bilong ol i olsem hul bilong matmat i op na kamapim kain kain sin i pulap long bel bilong ol, maus i kamapim [Rom 3:13]. Ol i no save pret long God liklik [Rom 3:18].

Mi i no tok olsem God yet i tok olsem long Baibel. Noken sutim tok long God o mi o sampela, yu yet sutim tok long yu yet.

Tru yu yet i no laik long tok bilas na tok pilai long holi nem bilong God, tasol sin i pulap long bel na tingting bilong yu i painim rot long kamaut long maus [Mt 12: 35-36].

Olgeta liklik toktok yu save autim long tok pilai long nem bilong God, bai yu yet i tokim God [Mt 12:36] na bihain bai yu kisim pe bilong sin, em lake of fire [Rev 20:15], everlasting fire [Mt 25:41], everlasting punishment [Mt 25:46], Lake which burneth with fire and brimstone [Rev 21:8], no rest day and night [Rev 14:10-11] na moa.

God i wetim yu long tanim bel long dispela ol sin tok bilas na tok pilai long holi nem bilong em [2 Peter 3:9]. Sapos yu no tanim bel na bilip long Kraus bai yu lus olsem tasol [Luk 13:3].

Dispela maus bilong yu, we yu save tok bilas na tok pilai long Holi Nem bilong God ya, sinek bai kaikaim maus, tang na bodi bilong yu insait long matmat na sol bilong yu God bai kukim insait long helpaia i no save dai [Mk 9:44].

Maus bilong yu God i wokim bilong litimapim Holi Nem bilong em na lotu tru long em, na givim biknem, ona na glori long em na em i no wokim maus bilong yu bilong tanim na tok bilas na tok pilai wantaim pipia Kanage bilong yu. Mi amamas long ritim bekim bilong yu.

PETER KELO KAINANTU ISTEN HAILANS PROVINS

Pairapim maus na nogat gutpela bekim

Dia Edita

MI LAIK komplek long ol memba na gavman ol i stap pulap long haus tambaran. Inap yupela daunim prais bilong kaikai i kam daun olsem bipo taim. Kopa, gol, daimon, kopi, kopra, tinpis, mit, rais, timba em i stap hia long Papua Niugini. Na bilong wanem tru yupela apim i go antap tru long skai. Inap yupela daunim i kam daun long graun olsem bipo taim. Em bai gutpela long yumi olgeta bai stap laip yet.

Yu husat brata o susa i laik sapatim raitim tasol long *Wantok Niuspepa* na mipela lukim.

MELTON LIMBO 5 MAIL NCD



WANTOK
KOMENTRI

Lida noken mekim lo bilong em yet

RAUSIM nem 'lida' long man, na em bai kamap man nating olsem yumi olgeta. Dispela em i klia long tingting bilong planti manmeri tude.

Tasol long wanem as tru na ol man mipela yet i makim olsem lida bai i mas kisim tingting long banisim ol yet long mekimsave aninit long Mama Lo bilong kantri?

Tingting bilong memba bilong Lagaip Pogera long senisim Mama Lo bai ol lida husat i asua taim ol i stap long opis i ken i gat malolo long mekimsave taim ol i sanap long kot bilong ol lida o lidasip traibunel em i wanpela kranki tingting tru.

Planti gutpela manmeri i no wanbel long dispela tingting.

Taim kantri i bin kisim independens i kam inap nau, toktok olsem i gat lo bilong ol bikman na lo bilong ol liklik manmeri i wok long go bikpela tru.

Ol lida i save asua na ol manmeri i save tok, em orait - em lida ya. Dispela kain pasin i no gutpela.

Lida i kamap lida long wanpela wok tasol. Em long go pas long o pipel. Long painim stretpela na gutpela rot long bihainim long kamapim gutpela sindaun bilong pipel.

I no bilong kisim pawa na bungim mani bilong ol yet na lus tingting long ol arapela manmeri.

Na tru tumas, sapos lida i ting olsem em i ken senisim lo bilong lukautim em na ol wanlain bilong em yet, em i mas kisim wanpela bikpela paul tingting olgeta.

Lidasip i no bilong ol lida long strong long holim pasim.

Lidasip em luksave i save go long husat manmeri i ken lukautim gut sindaun bilong ol pipel.

Man i go pas long Katolik Sios insait long kantri, As Bisop Sir Brian Barnes i toktok strong agensim tingting bilong memba bilong Lagaip Pogera.

Em i tok em bai nogut olgeta sapos ol lida i gat lo bilong ol yet na ol pipel i gat narapela lo.

Sapos ol lida i kisim malolo long mekimsave, long wanem as tru na ol i kamap lida?

Nau mipela i kamap klostu moa long bikpela jenerel ileksen long 2007, Sir Brian yet i givim liklik stia tok.

Namel long nau i go inap taim bilong ileksen, ol pipel i mas opim ai, yau na tingting na glasim gut wok bilong ol lida insait long Palamen.

Husat ol lida i tingting long vot bihainim tingting bilong Lagaip Pogera em bai soim klia olsem em i gat sampela asua pinis na i no laik bai Lidasip Traibunel. Em nau ol dispela lain em pipel i mas rausim ol long 2007.

Bikpela askim i stap olsem: Sapos lida em i gutpela lida, bilong wanem na em i mas i gat banis long mekimsave bilong Lidasip Kot?

Lida na Plen bilong God

INSAIT long Lidasip wanpela samting em i stap ples klia em God i save makim wan wan lida long kamapim sampela kain wok long helpim ol pipel i go inap long mak we God i laikim.

Taim dispela wok i pinis em wok bilong yu na lidasip bilong yu tu i pinis.

Sapos yu abrusim mak na stap long taim long wanpela lidasip posisen bai wok bilong yu i no inap kamap gut. Olgeta laik na bel kirap na-amamas we yu i gat na ol pipel tu i gat long yu bai i kam inap long mak bilong em na i pinis olsem.

Tok piksa olsem, yumi lukim long bipo stori long Baibel long laip bilong sampela lida olsem Moses. Moses, God i makim em long mekim wanpela wok tasol. Dispela wok em long karim ol pipel i kam aut long isip long han bilong King Fero i go long graun we ol i ken kaikai gut, malolo gut na Lotu long God wanpela tasol.

Moses i karim ol pipel i kamaut long isip na bringim ol i kam kamap long Mauten Nipo na em i pinis. God i givim em blessing long mekim dispela wok tasol, na i no bilong go

OL PRINSIPOL BILONG GUTPELA LIDA

wantaim Evangelist

OHARE JABERE



moa. Bikpela wok bilong Moses em long wok wantaim God long bringim ol lain long ples we nau ol i stap i go long nupela hap. Lida i gat dispela kain wok. Wok bilong kisim ol long ples we nau ol i stap i go insait long nupela hap. Mining bilong dispela kain tok em i bikpela moa insait long olgeta kain level bilong Lidasip. Yu mas kisim ol pipel long ples we nau ol i stap long Bodi, Sol o Tingting na Spirit i go insait long nupela level o ples we ol i painim nupela kain sindaun.

Long Bodi em i tok long ol kain sindaun na hevi bilong gutpela sevis olsem moni na wok bisnis, ol helt sevis olsem haus sik o etpos, rot sevis na trenspot na gutpela skul na edukesen em ol sampela samting we bodi i mas gat long en. Gutpela haus, gutpela kaikai na gutpela lait. Long tingting em i tok ol manmeri mas senis long kain tingting nogut we i save bagarapim laip na sindaun bilong ol nau i go long nupela kain senis tingting we ol i painim gutpela bel isi, malolo na bel gut.

Gutpela tingting i kamapim gutpela toktok, we i kamapim gut-

pela pasin na gutpela pasin i kamapim gutpela sindaun. Senis tingting we Jisas i wasim long blut bilong em (Rom 12:2). Baibel i tok long yumi mas kisim nupela tingting. Taim manmeri i kisim klia tingting long em yet na long ol arapela bai toktok na pasin bilong em tu i senis. Taim manmeri i no kisim klia tingting long olgeta kain samting em i mekim hat long ol long kamap wantaim gutpela toktok na pasin.

Long Spirit em i toktok long level bilong bilip na Kristen pasin we i save kamap ples klia taim manmeri i laikim God na go klostu long em na lotu long em na stap pas wantaim God. Olgeta manmeri i gat spes insait long spirit bilong ol we God yet inap long pulimapim dispela spes. Taim God i no pulimapim dispela spes, manmeri i stap nating na i no painim tru laip bilong oltaim. Taim manmeri i painim God na lotu tru long em na larim God i bosim laip bilong em, bai manmeri inap painim tru laip i gat mining na laip i pulap long amamas na bel isi. Spiritual Lidasip i save lukim dispela kain level long spiritual laip na

bringim manmeri i go moa insait long God.

Tripela level bilong lidasip

Insait long Kristen laip i gat tripela kain level bilong Lidasip.

Dispela tripela kain level em i toktok long Kristen laip i stat we na i go pinis we. Long ol piksa bilong sindaun na wokabaut bilong ol Israel yumi lukim olsem Kristen laip i stat long Pasova i go long Pentikos na pinis long Fis bilong Tabanakel.

Step 1: Pasova Ekspiriens

Step 2: Pentikos Ekspiriens

Step 3: Fis bilong Tabanakel Ekspiriens

Moses em i Lida bilong Pasova Ekspiriens.

Josua em j Lida bilong Pentikos Ekspiriens na David em i Lida bilong Fis bilong Tabanakel Ekspiriens. Dispela em i olsem piksa tasol long helpim yumi long luksave long mining na taim bilong lidasip.

Lidasip God i makim insait long plen bilong em long karimaut wok inap long mak. Taim yu stap long plen bilong God bai gutpela samting o kaikai i kamap ples klia long Lidasip na wok bilong yu. Taim yu stap long laik bilong yu yet, bai nogut gutpela samting bai inap kamap ples klia long Lidasip na wok bilong yu.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Neville Choi

Published by Justin Hansu Kili, MBE of Section 58, Allotment 3, Office 2, Walgan Drive.

Word Publishing Company Limited is owned by the four major churches of Papua New Guinea: Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

PASIFIK NIUS

PALAU: Thailand laikim moa manmeri long wok long Palau

KANTRI Thailand i laik salim moa manmeri bilong ol long go wok long liklik Pasifik kantri Palau.

Dispela em i toksave i kam long Minista bilong Komes na Tred. Otoichi Besebes.

Mista Besebes i tok tupela gavman opisa bilong Thailand i bin raun go iukim em long paitim tok-tok long ol sans bilong ol wokmanmeri bilong Thailand olsem ol haus boi, kuk, wokmeri long haus kaikai na ol arapela wankain wok manmeri long go wok long Palau.

Dispela tupela opisa husat i save wok long opis bilong Thailand long Hong Kong em nem bilong ol em Wannaporn Chu-Umnart na Napapom Senathaun.

Tasol hevi bilong tok ples tasol, em Besebes i tok bai bikpela hevi. Em i tok dispela i stap olsem hevi bipo yet taim ol bisnis i save kisim ol wok manmeri i kam long Saina na Banglades.

I gat 12-pela Thai manmeri i wok long Palau olsem ol kuk na ol wokmeri bilong ol haus kuk. Namba bilong gavman long sait bilong ol wok pepa i soim olsem i gat 7,383 wok manmeri bilong ol arapela kantri i wok long Palau i kam long 32 kantri samting.

Kantri i Filipins i go pas wantaim namba bilong ol wokmanmeri bilong ol i stap long Palau.

COOK AILANS: Kalabus meri go bek

WANPELA meri kalabus tasol husat i stap long Arorangi Kalabus long Cook Ailans. Robati nau i kam bek pinis long Nu Silan bihain long em i go long karim pikinini long hap.

Em i bin kalabus vet long 2000 bihain long em i bin go long Nu Silan long kisim marasin taim em i pandim hevi taim em i bel.

Mi. Pava i bin kisim mekmasave long long karim kalabus long Mei 2000 bihain long koim paim olsem em i bin kikin man bilong em long Ailans.

Bihain long em i pandim ol olsem em i woi long nuwara long ples na taim em i anvet ol taim em i long long Nu Silan long hap.

Robati nau em i stap anit long hap long taim bilong Robati long Nu Silan.

Em i namba to pikinini Robati i kam long woi na ma na kama insal em, haus kalabus, yet na bebeli woi i stap long sekura insal long kama na haus kalabus.

Namba to pikinini bilong Robati i go stap anit long lukaut bilong famili bilong em long Nu Silan, rasol em i bin dai no long taim bihain.

FIJI: Tambu long Vanuatu kava mas strongim tingting

SIAMAN bilong Kava Kaunsil bilong Fiji i tok tambu i stap long kava i kam long Vanuatu i mas strongim tingting bilong strongim prodakser long apim mak bilong sapai biang i jomeistik meket. Hatai Susatani Nawarivatu i tok ol taim i mas strongim tingting long pungin mak bilong kava long Vanuatu.

Dispela kava mas strongim tingting antap tu na long Vanuatu i mas strongim tingting long kava long Fiji. Dispela kava mas strongim tingting antap tu na long Vanuatu i mas strongim tingting long kava long Fiji.

Dispela kava mas strongim tingting antap tu na long Vanuatu i mas strongim tingting long kava long Fiji. Dispela kava mas strongim tingting antap tu na long Vanuatu i mas strongim tingting long kava long Fiji.

Dispela kava mas strongim tingting antap tu na long Vanuatu i mas strongim tingting long kava long Fiji. Dispela kava mas strongim tingting antap tu na long Vanuatu i mas strongim tingting long kava long Fiji.

Dispela kava mas strongim tingting antap tu na long Vanuatu i mas strongim tingting long kava long Fiji. Dispela kava mas strongim tingting antap tu na long Vanuatu i mas strongim tingting long kava long Fiji.

Dispela kava mas strongim tingting antap tu na long Vanuatu i mas strongim tingting long kava long Fiji. Dispela kava mas strongim tingting antap tu na long Vanuatu i mas strongim tingting long kava long Fiji.




PAWA DAUN: Ol pos bilong karim pawa i no sanap stret moa bihain long Katrina i rausim belhat bilong em long ples Gretna, Luisiana long Amerika long Mande.



NOGAT NAU: Kar i bagarap pinis. Dispela turangu man i lukluk long kar bilong em i bagarap olgeta bihain long bikpela raun win Katrina i kamap long Nu Olins long kantri Amerika. Raun win i wip, haus i bruk, na kar i bagarap. **REUTERS**

WOL NIUS WOL NIUS WOL NIUS



WOL NIUS WOL NIUS WOL NIUS



BRUKIM WARU: Darnell Stewart i ronim hos bilong em Brandy na tupela i brukim waru long siti Niu Olins long Amerika. Nau siti i stap anit long sampela mita waru. **REUTERS**



HAUS I LUS: David Diaz i sanap lukluk long haus we em na brata bilong em. Ol dispela bikpela hap pipia i sindaun antap long ol faunde-

sen we bipo moa long 30 haus i bin sanap. Raun win Katrina i katim Galp Nambis bilong Amerika long Mande long dispela wik na banisim planti manmeri antap long rup bilong haus bilong ol taim em i kamapim bikpela tait wara. **REUTERS**



TINGIM BEBI PASTAIM: Dispela man i tingim bebi bilong em na meri bilong em olsem na em i putim em antap long kar pastaim long tupela i kamaut long kar na wokabaut brukim waru. Bikpela tait wara i kirap taim bikpela raun win Katrina i bagarapim ples. **REUTERS**

Yumi mas sapotim femili bilong God

Yumi, ol pipel bilong PNG, i laik painim gutpela laip. Tasol, HIV/AIDS i laik bagarapim na kilim yumi. I no gat marasin o we long lusim dispela sik. Mobeta yumi bihainim we i gat laip tru.

Tingting na senisim laipstail!

Yumi ken stopim HIV/AIDS sapos yumi behavinim lo bilong God

- 1** Soim respek long yu yet na long narapela. "Bodi bilong yu mas i kamap bilong Holi Spirit" (1 Kor 6:19).
- 2** Yu mas stap tru long marit bilong yu. "Tupela bai i kamap wanpela bodi tasol" (Mt. 19:5).
- 3** Lusim pasim pamuk "Oltaim yupela i mas i stap longwe long pasim pamuk" (1 Kor 6:18)

Sapos yu o patna bilong yu i gat sik HIV/AIDS, yu mas tingting long laip bilong patna bilong yu na long laip bilong yu yet na yusim kondom long agensim HIV/AIDS.

CIMC tok gutbai long tupela bikman

Barbara Tomi long CIMC i raitim

OPIŠ we i save mekim wok lukaut na givim stia long gavman long karimaut gut wok bilong em i bin tok gutbai long tupela bikman bilong ol long dispela wik.

Tupela man husat i givim bikpela strong long Konsaltativ Implimentesen na Monitoring Kaunsil (CIMC) em Eksekutyutiv Opisa Nick Menzies na Dairekta bilong Institut ov Nesenel Afeas, Mike Manning.

Long toktok bilong em long bikpela tok gutbai sere- moni, Deputi Siaman bilong CIMC na Minista bilong Lens na Fisikel Plening

Dokta Puka Temu i tok tenkyu long tupela bikman long gutpela stia, glasim ol wok na plen long bihain taim, ekspiens na gutpela wok long kisim CIMC i kam inap nau.

Dokta Temu i bin tok tenkyu long Mista Menzies long bikpela wok em i mekim long givim teknikel stia tok long CIMC long tupela yia i go pinis.

Em i tok tenkyu tu long Mista Manning long givim gutpela stia long karimaut ol wok etministresen na long lukim olsem taim ogenais- esen i kirapim wok 8-epla krismas i go pinis, CIMC i strongim gutpela wok pren na toktok namel long sivil sosaiti, praivet sekta na ol

gavman patna i kamap strong moa.

Mista Menzies bai lusim PNG long wiken na go long Berlin long kantri Jemeni long skul bilong kisim Mastas digri bilong em long sait bilong Pablik Polisi.

Na Mista Manning bai go malolo long ples bilong em long Rabaul.

Mista Menzies i tok em bin laikim tru long wok wantaim CIMC.

"Mi painim olsem dispela wok i gutpela stret tasol long wankain taim, em i gat salens. Mi bilip bai mi painim narapela opis we i bungim wantaim kain gutpela wok olsem we i gat ol manmeri i karimaut gut wok bilong ol.

"Mi lainim planti samting



TOK GUTBAI: Progrem kodineta bilong Femili na Seksuel Vailens Eksen opisa Ume Wainetti (namel) na narapela opisa Barbara Tom ii amamas wantaim mista Menzies bihain long ol i sainim wanpela pepa bilong wokbung wantaim Pot Mosbi Jenerel Haus Sik sapot senta long las mun. Mista Menzies em i bin go pas long stretim dispela wokbung pepa taim em i stap wok olsem eksekutyutiv Opisa bilong CIMC.

long dispela wok. Long dispela wok wantaim CIMC, mi bin raun long planti hap bilong PNG na kisim sans long lukim rot we kantri i wok long develop long en. Mi ting mi lainim planti samting long mi yet, long PNG na wok taim mi stap long hia," Mista Menzies i tok.

Mista Menzies i lukim wok bilong CIMC olsem namel man i bungim ol pipel na gavman. Dispela em long givim infomesen na luksave long pipel we i helpim ol long wok na save long ol

samting. Em i bikpela hap long demokrasi we ol pipel i gat sans long sekim ol lida na ol i mas bihainim gutpela pasin, noken wokim hait pasin na karimaut wok na givim gutpela sevis i go long ol pipel.

"Mi ting olsem yumi noken lusim ol lida i wokim samting long laik bilong ol na demokretik sistem i luksave long dispela na i mekim ol lida i mas sanap baksait long ol pipel. Tasol long bekim gut, pipel i mas kisim na i mas i gat gutpela

infomesen na luksave long mekim gut wok bilong ol," Mista Menzies i tok.

Antap long ol bikpela wok Mista Menzies i mekim long CIMC, em bin go pas long kirapim "Raitman Soka tim" wanpela tim i save pilai insait long Pot Mosbi Soka Asosiesen Divisen 3 we i save gat strongpela sapot long olgeta wiken taim ol i pilai. Raitman em i wanpela long ol tim i gat ol waitman tasol i pilai long em na i soim kain pilai bilong ol long soka fil.

EXPENDITURE CONTROL IMPORTANT NOTICE TO SUPPLIERS OF GOODS & SERVICES TO GOVERNMENT



GAVMAN TOK LUKAUT LONG WAS LONG MONI BILONG OL PIPEL BIKPELA TOKSAVE IGO LONG OL BIS- NIS NA OL KAMPANI HUSAIT I SAVE MEKIM BISNIS WANTAIM GAVMAN

The Government has identified the control of expenditure as one of its foremost priorities.

On the 1st March 2003 a new framework of expenditure control was introduced to promote greater rigor in the government expenditure process and to provide suppliers and contractors with certainty that Government funding will be available to pay for their goods and services.

Legislation has provided that claims for payment must be supported by either:

- A computer generated ILPOC (Integrated local purchase order & claim form),
- or, an APC (Authority to Pre-Commit).

Claims and contracts that are not supported by a valid ILPOC or APC are null and void and will not be honored by the Government. If you do not have either a valid ILPOC or an APC you do not have a binding claim against the State.

Question: Where do I need an ILPOC?

Answer: You require a valid ILPOC if you are providing goods and services to a National Department or Provincial Administration when the value of the transaction is less than K100,000.

Question: When do I need an APC?

Answer: You require an APC (together with a contract) if you are providing goods or services to a National Department, Provincial Administration or Local Level Government when the value of the transaction is greater than K100,000.00.

Question: As a Government Officer what Am I required to do?

Answer: Any Officer from a National Department, Provincial Administration or Local Level Government who seeks to contract suppliers without providing the appropriate ILPOC or APC is acting outside of the law and without authority.

Remember, when doing business with the Government get an ILPOC or an APC.

Gavman i luksave pinis olsem rot bilong was long moni bilong ol pipel em i wanpela nambawan samting insait long Kantri.

Long Mun Mas 2003, Gavman i kamapim wanpela lo pinis na em i givim pawa long gavman long mekim bisnis wantaim ol kampani na ol bisnis haus olsem Gavman bai i gat mani long baim olgeta bisnis husait i givim sevis i go long gavman. Dispela nau bai stopim kain pasin bilong nogat moni bikos nupela lo nau i strongim Gavman long imas igat moni olgeta taim long benk long baim ol man na meri o kampani husait i givim sevis i go long Gavman. Dispela nupela Lo i tok olsem, olgeta bisnis kontrak wantaim Gavman imas igat ol kain fom ol i kolim olsem:

- ILPOC fom em komputa yet i printim long-em, na
- APC fom, em kain fom i tok orait long Gavman Dipatmen long spendim moni em bai kisim long baset (budget) long taim bihain.

Ol kontrak bisnis wantaim gavman em ol ino gat kain tupela fom olsem ILPOC o APC, em bai gavman ino luksave long wanem kain wok i kamap na bai ino inap baim. Dispela tu i min olsem, ol bisnis na ol kampani bai wok nating na tu bai ino inap long bringim gavman igo long kot aninit long dispela lo.

Kwesten: Wanem taim tru bai mi kisim dispela fom ILPOC?

Ans: Yu bai i mas kisim ILPOC sapos yu wanpela man o kampani isave givim sevis igo long gavman bipo long yu laik sevis igo long gavman.

Kwesten: Wanem taim ru bai mi kisim dispela fom APC?

Ans: Yu bai imas kisim APC fom taim yu gat bikpela kontrak wantaim Gavman, Gavman Dipatmen, Provinsol Gavman, o Lokal Level Gavman. Dispela kain kontrak, moni bilong em i mas istap antap long K100,000.00.

Kwesten: Mi olsem wanpela Gavman Opisa, mi mas mekim wanem samting anini long dispela nupela lo bilong mekim bisnis wantaim gavman?

Ans: Ol Gavman Opisa bilong Nesenel Dipatmen, Provinsol Administresen, o Lokal Level Gavman, husait i laik givim kontrak wok igo long ol bisnis man na meri o kampani, na ino bihainim dispela nupela Lo i mas save olsem ol bai brukim dispela lo na ino bihainim stret wanem samting em dispela nupela Lo itok long em.

Tingim, taim yu laik wokim bisnis wantaim Gavman yu mas igat dispela ILPOC fom o APC fom em nau bai bisnis bilong yu bai orait tasol.


Thaddeus Kambanel
Secretary

Gutpela tingting na bel isi i gat strong agensim sik AIDS

PAPUA Niugini bai selebretim 30 yia indipendens anivesari long Septemba 16, 2005, na wanpela hevi i wok long kamap bikpela tru insait long kantri em sik HIV/AIDS.

Ol ripot na namba i kamaut pinis i tok moa long 100 nupela manmeri bai kisim dispela binatang long olgeta yia.

Planti ol sios, NGO na gavman ejensi i kirapim wok awenes bilong skulim ol pipel long sik HIV/AIDS na ol rot bilong abrusim dispela sik.

Wanpela sios ogenaisesin, Revival Centrè ov PNG tu i helpim long skulim ol manmeri bihainim tok bilong God. Na planti manmeri husat i gat HIV/AIDS i lukim senis i kamap long laip bilong ol taim ol i harim tok tru bilong tanim bel, kisim baptais na kisim spirit bilong God.

Stori bilong Rebecca

Hia em tru laip stori bilong wanpela susa husat God i oraitim em long sik HIV/AIDS. Rebecca David, bilong Kimbe, Wes Nu Briten provins i gat 45 krismas. Em i marit na i gat 5-pela pikinini. Long yia 2004, Janueri, Rebecca i painim aut olsem em i gat HIV/AIDS. Em i luksave bihain long ol mak bilong em i kamap ples klia na em i go tru long haus sik na ol dokta i tokim em. Man bilong Rebecca tu i bin dai long HIV/AIDS las yia.

Rebecca i amamas tasol na i stori. Em i tok, taim binatang i go insait long blut na bodi, em i kilim ol sel. Orait ol pinga neil bilong han na lek i stat long kamaut. Gras long het bilong mi tu i lus lus nau.



REBECCA DAVID: Rebecca i tok bilip long bikman i bin givim bek strong bilong em.

Taim em i lukim namba 2 mun bilong 2004, kela i kamap pinis long het bilong em.

Bipo long em i painimaut olsem em i gat HIV/AIDS, Rebecca em wanpela hap meri bilong mekim ol kain kain raskol pasin. Rebecca i tok, planti taim ol man i laik mekim raskol pasin o arapela pasin nogut i stap long Galasia 5:19-21, mi no save tok nogat, mi save bihainim na mekim tasol. Sapos ol askim mi long helpim ol mekim stil pasin, mi save tok yesa tasol na bihainim.

Strong bilong pikinini meri

Long namba tri mun bilong 2004, mi stat pilim strongpela het pen. Soa tu i stat kamap moa yet long maus. Long dispela taim, em i go malum malum, i no inap holim kaikai na putim long maus. Em i painim hat tru long go long toilet tu. Sampela taim i hat tru long pekpek na pispis.

Taim bikpela pikinini meri i lukim olsem, em i save wari nogut tru long mama bilong em. Krismas bilong pikinini meri em 13. Ol de i go pinis, na pikinini meri i stap na lukim Rebecca i wok long dai isi isi. Pikinini meri nau i save holim spun na putim kaikai long maus bilong mama bilong em. Hevi bilong em long mak 75 kilogrem i go daun tru long 45 kilogrem."

"Smel bilong bodi i kamap bikpela moa yet. Tasol pikinini meri i no lusim bilip bilong em".

Smel bilong bodi i kamap bikpela moa yet. Tasol pikinini meri i no lusim bilip bilong em."

Rebecca i tok, "em i save holim han na sapatim mi taim mi laik go



TOK STRONG: Rebecca i tok strong bilong liklik pikinini meri bilong em i bin strongim em taim sik i bin holim em.

long toilet tu."

Mi lukim pikinini meri i sindaun klostu long mama taim mi toktok wantaim em.

"Mi lukim ol hol i kamap namel long ol tit bikos gam i sting. Sampela taim mi putim laplap long maus long pasim susu bilong sua long kapsait nogat bai maus i pas."

Rebecca i stretim nek gut na i tok, moa long moning taim mi kirap long slip, maus i save pas na hat long mi opim.

"Mi save mi givim hatwok long pikinini meri tasol dispela laik bilong mi olsem mama bilong em i bikpela tumas".

Rebecca i tok i go long pinis bilong yia 2003, em i bin bagarap olgeta na wet tasol long dai.

"Long Janueri 2004, mi stap long haus na mi harim stori olsem sampela HIV/AIDS sikman i kisim hiling na kamap orait.

Harim stori bilong tanim bel

Mi nogat bilip ya. Dai bilong mi em mi save bai kamap eni taim. Mi go long painimaut na mi harim ol toktok long tanim bel, kisim baptais na kisim Holi Spirit na God bai lusim sin bilong yu na oraitim sik bilong yu. Ol dispela lotu lain i kam long Rivaivel Senta bilong PNG," Rebecca i tokaut.

"Mi bihainim ol go lotu long Sande. Pasin bilong ol long welkamim ol nupela man o ol sik man tu i narapela kain olgeta.

Taim mi lukim ol i smail na sekan long mi, dispela i kirapim gutpela tingting long mi. I nogat pasin bilong diskriminesen o bagarapim arapela.

Pasin bilong wanbel na toktok tu i narapela. Ol i soim mi tu long ol arapela manmeri husat i gat HIV/AIDS na ol i no luk sori na wari na skin bilong ol i sain moa yet.

Man, mi lukim na mi laikim. Orait bihain long lotu, mi tanim bel kisim baptais. Dispela em long Janueri 2004."

Kisim bek skin bilong em

Bihain long em i baptais, gras long het bilong mi i kamap (gro gen) na karamapim ol kela, sua long maus i pinis, na i nogat smel moa kamap long bodi.

"Mi kisim bek skin bilong mi na hevi bilong bodi bilong mi i go antap gen long 65 kilogrem. Strong bilong mi kam bek na mi yet holim kaikai na putim long maus. Mi yet nau wokabaut i go kam long felosip, kuk, wasim na mekim ol arapela wok.

"Mi no pilim strongpela hetpen (ol AIDS peisen) save pilim na ol pinga long lek na han i gro bek gen. Rebecca i strongim tok olsem, long mi yet God yet i save larim sik i kamap long kisim bek manmeri."

Rebecca i stori olsem i gat planti awenes na toktok i kamap long rot-bilong stap seif na abrusim sik AIDS tasol dispela bai no inap stopim dispela sik nogut.

"Tok bilong God i gat laip na pawa long hiling, oraitim, na senisim man na sik," em i tok.

Long pasim toktok, pikinini meri bilong em i tok, "Mi lukim mama bilong mi husat i dai isi isi i senis na kamap gutpela long ai bilong mi."

Rebecca yet i autim bilip bilong em na singaut long husat manmeri i gat HIV/AIDS na i stap wantaim bikpela poret long dai na sem long luksave olsem i gat rot bilong abrusim sik HIV/AIDS.

Em i singaut long pablik long harim ol brata na susa bilong em insait long lotu i givim testimony o autim tok long laip stori bilong ol long Intanesenel Rali bilong Rivaivel Senta we bai i kamap long mun Septemba namba 23 i go inap namba 25 de.

Rebecca i tok klia olsem em i bin go tupela taim long haus sik, na dokta i lukim skin bilong em i kamap gut gen.

Em i tokim Rebecca olsem em i amamas long lukim olsem skin bilong kam bek na ol i givim em gen 6 mun bihain long em i mas go bek lukim ol gen.

Toksave: Rebecca yet i bin givim tok orait long putim stori bilong em wantaim wanbel bilong slos bilong em long givim skul long ol arapela manmeri. - Edita

Raun lukim wok bisnis long Goroka

Sape Metta i raitim

TRED, na Industri i bin i gat bikipela wok tru long taim bilong bikipela Melanesia Spiahet Grup (MSG) we i bin kamap long Goroka long tupela wik i go pinis. Olsem na Treid na Industri Minista bilong Papua Niugini yet, Paul Tiensten i bin kamap tu long dispela kibung. Mista Tiensten i bin raun lukluk tu long ol kain kain industri i stap antap long Goroka.



PASIN BILONG MELANESIA STRET: Praim Minista bilong PNG Sir Michael Somare i mekim pasin Melanesia stret na givim gaden kaikai na wanpela pik long wan wok Praim Minista bilong Vanuatu, Ham Lini Vanuaroro. Lukluk i stap em Ledi Veronica Somare na Misis Ruth Lini. Kalsa bilong yumi em i wankain, na Sir Michael i givim wankain kaikai na pik i go long ol arapela praim minista em Sir Allan Kemakeza (Solomon Ailans) na Mista Kaliopate Tavola, Minista bilong Foren Afes na Ekstenel Tred long Fiji.



LUKLUK RAUN: Sir Michael na Sansela bilong Yunivesiti bilong Goroka, David Rawlence i lukluk raun long nupela laibreri bilong UOG wantaim Gavana bilong Isten Hailans, Malcolm Kela Smith.




SKELIM STRONG BILONG LOKOL WAIN: PNG Foren Afes Minista, Sir Rabbie Namaliu na wan wok bilong em long Solomon Ailan. Laurie Chan i tram lokol wain bilong Goroka yet, Live Lave long Masy viles



SLIP LONG TAIM BILONG WOK? Nogat ya. Kamera man i kisim piksa bilong tupela taim ai bilong tupela i pas long wankain taim. Tred na Industri Minista Paul Tiensten na Dipatmen Sekretri bilong em Alois Tabareng long opim bilong Tred na Ikonmik Opisas miting long MSG kibung.



SWITPELA BINATANG: Minista Tiensten i stori wantaim wanpela man bilong lukautim ol bi o binatang i save mekim hani. Dispela bi fama i tok kliia long rot bilong em long mekim hani we bisnis bilong ol Anego Honey projek long Kabiufa i save mekim.




KOPI, KOPI, NA MOA KOPI YET: Goroka Kopi Rousta fektori long Goroka em ples we ol i save kukim ol kopi bin na mekim kopi bilong dring. Mista Tiensten i bin go raun lukim wok bilong ol.

Of Foto SAPE METTA


Jimmy

pairapim Mosbi


PAIRAP: Jimmy Barnes wantaim big gel bilong em, Mahalia i mekimsave long singsing.



TROMOI HAN: Jimmy Barnes tromoi han long ol manmeri.



BOI ROS: Gitaris bilong Jimmy Barnes, Daniel Spencer i pulim planti ai long wei em i parapim gita.



PINGA I GO: Ol fan bilong Jimmy Barnes i tromoi han na singaut, 'Yu moa yet!'

Ol Foto: ANDREW MOLEN

Andrew Molen i raitim

PAIRAP bilong gita na nek nogut bilong Jimmy Barnes i kirapim skin bilong olgeta manmeri husat i bin kamap long lukim em pilai long Pot Mosbi Kantri Klab las wik Fraide na Sarere.

POMCC long dispela taim i lait stret wantaim pairap bilong Jimmy Barnes na rok en rol ben bilong em.

Ol manmeri i kalap na singaut long soim sapat na amamas bilong ol long lukim kain biknem musik atis i kam pilai long ai bilong ol.

Na Barnes na ben bilong em i pilaim ol singsing we planti long ol pipel i save. Ol i singsing bihainim em na yu ken harim nek bilong ol antap moa long ol traipela spika i wok long pairap i stap.

Long taim bilong lid brek, gitaris Daniel Spencer i no givim sans na i laik brukim string stret wantaim ol pinga bilong em.

Drama tu i mekim save stret long baksait na ol lait long spika boks we i soim pairap bilong en i wok long aburusim grin na i go long red.

Tasol i no musik tasol, lait tu i on bihainim musik na smuk i kirap wantaim.

Long Sarere nait pikinini meri bilong Jimmy, nem bilong em

Mahalia i kamap na pilai wantaim papa na ben bilong em.

Tupela i singim wanpela singsing long nupela albam we Mahalia i raitim na taim em i singsing, ol manmeri i soim wankain sapat ol i givim long Barnes.

Tupela nait wantaim i pulap na sapos yu sanap klostu long stes bai yu painim ples long muv o mekim nais.

Bihain long biknem piano man bilong PNG, Buruka Tau bilong i kukim sampela singsing pinis lait long stes i go daun liklik na Barnes ol i ron i kam long stes na lait i kam on ken wantaim planti singaut na wisel i kam long ol manmeri.

Ol i kam na i no westim taim, gita, bes na dram i pairap wantaim na Barnes i opim maus na olgeta i harim nek we planti i harim bipo na i save laikim gut tru.

"Nau long nait bai mipela i pilaim ol olupela singsing we yupela i save gut long en.

"Sampela long taim mi stap wantaim 'Cold Chisel' na long '80's na '90's na sampela bai i kam long nupela albam bilong mi 'Double Happiness', Barnes i tok bihain long em i pairapim namba wan singsing, 'Flames Trees'.


"Sampela bilong yupela bai save long dispela," Barnes i tok na pairapim 'Rising Sun.'

Ol manmeri i singaut: "Khe Sanh" we ol i laik harim na Barnes i tok, "Noken wari em bai kam, yumi singim ol narapela pastaim" na ol i harim musik bilong "No Second Prize" we em i rekotim long 1984 long namba wan solo albam bilong em na ol singaut i kirap ken.

Bihain long "Lay down your guns" na "Working Class Man" we planti i save gut tru ol, em i pairapim "Khe Sanh" na olgeta i singsing tasol taim singsing i kam long, "... well, the last train out of Sydney's almost gone, yeah, yeah," i nogat wanpela i sanap nating na nek bilong ol i wankain olsem pairap bilong ol spika.

Dispela so we Boroko Motors na Blue 7 Team i bin kisim i kam i bin wanpela stail rok en rol so stret na planti i mas yau pas yet long pairap bilong musik, ol haphap toktok bilong ol singsing i mas i stap yet long maus bilong wan wan manmeri na lukluk bilong stes na we bilong Barnes na ben i pilai i stap yet long tingting bilong planti tu.

"Tenkyu tru long kam na mipela i gat bikpela tingting long bungim yupela ken sapos mipela i kam raun olsem neks taim," Barnes i tok bipo long em i lusim stes bihain long laspela singsing.



AI I PAS TRU: Bik kraud i no lusim hap ples ol i sanap long en, ai i pas long Jimmy Barnes i go musik i pinis.

EMTV GAID

Fonde 1/09/05

Table with 2 columns: Time and Program Name. Includes STATION OPEN, JOYCE MEYER, NATIONAL NINE NEWS, etc.

Fraide 2/09/05

Table with 2 columns: Time and Program Name. Includes STATION OPEN, JOYCE MEYER, NATIONAL NINE NEWS, etc.

Sarere 3/09/05

Table with 2 columns: Time and Program Name. Includes PLANET FANTA, PIGS BREAKFAST, etc.

Sande 4/09/05

Table with 2 columns: Time and Program Name. Includes STATION OPEN, EMTV TOKSAVE, etc.

Sandaun, Milne Bay, E.N.B., Eastern Highlands, Manus & Chimbu. SUNDAY FOOTBALL Round 26 - Dragons v Newcastle Knights...

Mande 4/09/05. STATION OPEN, JOYCE MEYER, NATIONAL NINE NEWS, MALOLO CLUB, etc.

Tunde 6/09/05. STATION OPEN, JOYCE MEYER, NATIONAL NINE NEWS, MALOLO CLUB, etc.

Tunde 6/08/05. STATION OPEN, JOYCE MEYER, NATIONAL NINE NEWS, MALOLO CLUB, etc.

Raun wantaim Kanage olgeta wik



YUMI FM NATIONAL WEEKLY HITPARADE September 2, 2005

Table with 3 columns: Singsing, Musik Artis, and Dispela Wik. Lists artists like Maten Kandiek, Queen 4 Lane, Rosie Marara, etc.

CATHOLIC RADIO 103.5 FM

Fonde. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN RADIO WORLD NEWS...

Mande. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Fraide. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Tunde. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Sarere. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Tunde. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Sarere. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Tunde. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Sarere. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Tunde. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Sarere. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Tunde. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Sarere. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...

Tunde. 6:00 - ANGELUS, 6:05 - MEDITATION/INSPIRATIONAL MUSIC, 7:00 - VATICAN WORLD NEWS...



Laikim Penpren

Nem: Geldo Gosiba

Krismas: 16 (meri)

Adres: Mercy Secondary School, PO Box 580, Wewak, East Sepik Province

Save laikim: Stori, raitim pas, pilai soka na volibol na wokim fani.

Nem: Antae Joseph

Krismas: 30 (man)

Adres: Trukai Industries, PO Box 781, Goroka, Eastern Highlands Province

Save laikim: Bodi bilding, wokim gaden na go long wok.

Nem: Stanley Martin

Krismas: 19 (man)

Adres: Aiyura National High School, PMB Kainantu, Eastern Highlands province

Save laikim: Lukim muvi long TV na tok pilai.

Nem: Robert Akau

Krismas: 18 (man)

Adres: Margarima Provincial High School, PO Box 33, Mendi, Southern Highlands Province

Save laikim: Go lotu, pilai ragbi tas na basketbol, pilai gita, harim musik na stori tumbuna.

Nem: Dorcas Ahen Amosah

Krismas: 21 (meri)

Adres: Church of the Lord, PO Box 452, Agona Swedru, Ghana, West Africa.

Save laikim: Swimming, senisim presen na raun lukim ol pren.

Nem: Clement E. Atiou

Krismas: 20 (man)

Adres: C/- Camilus Eliape, Dept of Treasury, PO Box 407, Vanimo, Sandaun province

Save laikim: harim musik, lukim TV, trening masel ats, wok long gaden, kukim kaikai na pilai soka.

Nem: Jeffrey Kanai

Krismas: 30 (man)

Adres: Wewak Hill Katolik Misin, PO Box 1269, Wewak, East Sepik Province

Save laikim: Go long lotu, ridim Baibel, kukim kaikai, pilai soka, ridim buk, wok gaden na raitim pas.

Nem: Lizandra Lawrence

Krismas: 16 (meri)

Adres: PO Box 1792, Lae, Morobe Province

Save laikim: Go raun, stori na pilai na go long skul.

Nem: Lazandra Lawrence

Krismas: 16 (meri)

Adres: PO Box 1792, Lae, Morobe Province

Save laikim: Stori, pilai na go long skul.

Nem: Sandra Lawrence

Krismas: 16 (meri)

Adres: PO Box 1972, Lae, Morobe Province

Save laikim: Go long skul na pilai soka.



STORI TUMBUNA


Hau paia i kam long ples

BIPO tru i gat tupela enimol i stap, Dok na Sikau. Tupela i gutpela pren tru. Tupela i stap olsem pren inap longpela taim stret. Tupela i no save kros o pait. Tupela pren ya i save kukim-kaikai bilong tupela long hat bilong san tasol. Olgeta taim tupela save lukim smok i save kamap long wanpela maunten paia. Em Manam Ailan.

Tupela i save tingting planti na tok husat i save wokim dispela smok, moabeta mitupela mas i go na lukim na kisim i kam.

Tupela i wok long toktok i go na Sikau i tokim Dok olsem, pren yu i kisim i kam. Sapos mi painim birua bai mi i no inap kamap long yu. Sapos yu wet longpela taim tumas, em yu mas save em i painim bagarap. Em Sikau i tok olsem pinis na swim i go olsem long Ailan.

Dok i wok long wetim pren bilong em Sikau i stap long bik ples long nambis. Sikau i swim i go i go na kamap long nambis billong Manam Ailan. Em i malolo pinis na i go antap long ples smok i wok long kamap. Em i go kisim wanpela hap



paiawut i wok long lait na kambek long nambis na swim i kambek. Taim em i swim i kam na si (solwara) i traim long mekim i dai paia bilong em. Tasol nogat em i was gut tru na i kam. Em i kam klostu tru long nambis na bikpela si tru i kirap na mekim indai paia bilong em. Taim Dok i lukim olsem em i kros nogut tru na tokim Sikau

nau bai mi go kisim. Na em i swim i go. Em nau Dok i traim. Em i swim i go na kamap, malolo pinis na i go na kisim wanpela hap paiawut i lait na kambek. Na em tu olsem. Si i wok long traim long wasim paia bilong bilong em, tasol Dok i was gut tru long paia na i kam kamap. Em i go antap na i tokim Sikau

nau bai yum as painim paia bilong yu yet na kukim kaikai. Na trangu Sikau ya i harim olsem na em i sem na em i go long bus i stap. Olsem na nau Sikau i save stap long bus na Dok i save stap wantaim man long ples. Na tu olsem na nau mipela long bikples i gat paia. Em tasol liklik stori.

Stori i kam long Bogia,

Mi laikim helpim

Dia Laiplain

Mi winim hai skul pinis na mi bin kam long taun na painim wok olsem klak long opis.


Mi amamas tru na mi pilim olsem mi laik stap longpela taim long dispela wok inap mi lapun. Tasol bihain mi les long wanpela kain wok na mi tromoim em.

Orait, nau mi go skul long wok ensinla tasol mi no wokim gut long tes na mi bel nogut na go bek long ples.

Mi pasim tok olsem, maski, moabeta mi go bek na mekim wok long ples. Tasol bihain long wanpela yia gem, mi les pinis. Mi laikim tru pasin bilong sindaun long ples, tasol mi no inap.

Olsem na nau mi stap bek long taun na mi raun long painim wok. Mi bin go toktok wantaim ol opisa bilong wanpela kampani tasol tok bilong wanpela arapela man i winim mi na em i kisim wok. Olsem na bel bilong mi i kaskas tru.

Inap long yu ken skulim mi o helpim mi long painim wanpela wok inap long givim amamas long mi na ol pren bilong mi?



Dia Pren,

I gat planti arapela pipel i gat wankain wari olsem yu. Ol i laik painim wok tasol i nogat. Dispela em i asua long ol skul sistem bilong yumi. I no long taim bipo na ol sumatin i winim skul na painim wok. Tasol tude, dispela i no tru. Tude, i nogat inap wok long olgeta skul liva.

Nau yumi go bek na glasim gut sindaun bilong yu long taun. Yu bin holim wanpela wok tasol yu tromoim gem. Watpo? Bilong wanem yu no bin laikim dispela wok? Ating yu no amamas long en? Ating em i hat tumas? O yu no save gut yu mas mekim wanem kain wok? O yu no bin laikim ol wanwok bilong yu?

Sampela taim, sampela pipel i no laikim wok bilong ol tasol em i asua bilong ol yet. Long taim bilong wok, yu save bihainim olgeta oda bilong bosman bilong yu? O yu haphapim tasol na mekim nat-

ing?

Yu mas tingting long dispela samting: taim yu statim nupela wok, pastaim yu mas mekim planti kain kain wok yu no laikim. Na tu, yu nupela na olsem, ol bai givim yu ol wok long yu, em ol arapela wok yu gat long sekim ol samting na yu save raitim ol namba long kat tasol. Na yu les long dispela pasin bilong raitim ol kat oltaim. Tasol yu mas ting olsem, dispela wok bilong mi i givim toksave long ol hetman na olsem tasol, ol stua i noken sot long rais na kaikai. Olsem nau yu save wok bilong yu i helpim kampani tru.

Orait, sapos nau yu mekim, mekim tasol, maski yu no laikim dispela wok. Orait, bipo yu tromoim dispela wok bilong yu, yu sindaun na tingting pastaim long dispela tupela samting: Yu laikim wanem kain wok tru? Na, i gat wanpela ples we yu ken painim dispela wok o nogat?

Yu tok yu bin raun long painim wok tasol wanpela arapela man i winim yu. Ating em i bikos dispela man i save moa long pasin bilong raun na painim wok. Sapos yu laik mekim tru, yu mas tingim ol dispela samting:

Yu mas ritim o askim bilong kampani i stap long niuspepa. Yu noken giaman na go painim wanpela wok yu no save liklik long en.

Kisim olgeta skul ripot na setifiket i go wantaim yu. Painim klinpela klos na yu noken bilas nating.

Taim yu bekim tok, yu mas tok strong liklik bai arapela man i ken harim yu gut. Yu noken sem. Tasol yu noken giaman na tok yu save pinis long wanpela wok, taim yu no save liklik long en.

Em tasol sampela tingting bilong helpim man long taun i raun raun long painim wok. Neks taim yumi toktok long skulim man i sindaun i stap long ples.

Laiplain

Sapos yu gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telipon namba 3260011. Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu.



Bisnis bilong Groim Diwai insait long PNG - Planim diwai long ol renfores eria

Rot bilong groim ol spisis diwai i save groa insait long PNG

Artocarpus altilis (kapiak)



Nem bilong en: bredfrut, kapiak

Ples we em i save groa: Planti manmeri i tok olsem as ples bilong kapiak em long Niugini, Moluccas, western Melanesia na Maikronesia. Ol kapiak i nogat pikinini bilong em na ol arapela i gat pikinini i save groa long planti hap insait long ples hot.

Artocarpus altilis em i wanpela diwai bilong ples hot i stap kostu long nambis we i save groa long gutpela graun i gat planti gris na long arare bilong ol ples tais. Em i save groa daun bilo long mak bilong 600 mita antap long solwara na ol ples i stap namel long 20 na 40 digris sentigret. Ol yanpela diwai i save groa gut aninit long ples kol tasol bihain ol i mas kisim bikpela san inap.

Wanem kain diwai: Kapiak diwai em i wanpela diwai i save groa inap longpela bilong em i stap namel long 15 na 25 mita, na bikpela bilong namel bilong em i groa inap long 1.2 mita. Skin diwai bilong em i smut na kala bilong em i lait. Ol liklik han diwai i bikpela. Lip bilong em i bikpela namel long 20 na 60 cm X 20-40cm. Ol plawa i save kamap planti. Man na meri plawa i save kamap long wanpela diwai tasol.

Taim bilong em long flaua: Long ol ples hot, taim bilong plawa long kamap i save bihainim taim bilong planim na em i save karim pikinini olgeta taim long yia. I save gat taim bilong plawa long kamap namel long Epril na Jun. Bikpela taim bilong em long karim em namel long Julai na Septemba na prut i save kamap olgeta taim long yia. Yu ken kaikaik pikinini bilong em na i gat namel long 2 na 5 pikinini insait long wanpela prut. Hevi bilong prut em 9.6 kilogram na hevi bilong pikinini bilong em i 5 grems.

Kisim sid na redim bilong planim: Prut bilong em i save tanim yelo taim em i mau. Yu mas bungim ol mau prut

insait long ol basket na larim i sindaun long ples kol. Yu ken kisim pikinini bilong em sapos yu katim prut wan-taim bus naip.

Rot bilong holim i stap: Lukim rot bilong holim sid i stap na em i mas i gat inap wara inap long 60 pesen. Sid i nogat taim we em i save stap nating na i no kru. Em i save kru kwiktam na i no inap stopim groa bilong em. Tasol insait long sampela wik tasol, sid i ken lusim strong bilong em. I no gutpela long tarim i stap insait long bokis ais.

Rot bilong yusim:

- Kapiak i gutpela kaikai long wanem em i save givim gutpela samting bilong strongim bodi. Yu ken boilim, kukim long paia o praim kapiak yet na sid bilong em.
- Diwai bilong em i yelo na braun i go inap em i gold braun. Ol i save yusim bilong mekim ol frem na kanu.
- Wara bilong kapiak diwai em ol i save yusim olsem glu.
- Prut na lip bilong em i gutpela olsem kaikai bilong ol animal.
- Ol lip bilong em i gutpela long karamapim ol kaikai.
- Rabim diwai wara bilong em long tritim ol bun i bruk na masol i tait.
- Skin diwai bilong em i ken stretim ol het pen.
- Ol diwai yet em ol i save groim bilong bilas, banis long win o long givim kol long ol arapela krop olsem kopi.

Rot bilong groim long neseri: Ol pres sid i save kru kwik taim. Yu mas planim 5cm namel na 1cm i go insait long graun. Em bai kru tupela wik bihain long yu putim long graun. Taim ol i kru, yu ken planim ol long ol bikpela pot. Taim ol i wanpela yia tasol, yu ken planim ausait long graun.

Kapiak em ol i save groim long ol an rop bilong em.

McCarthy & Associates (Forestry) Pty. Ltd.
National & International Forest Consultants
mccaf@datec.net.pg

"Long kisim tok stia long olgeta wok diwai"

Maxtone-Graham kisim luksave bilong ol Hailans fama

MEMBA bilong Anglimp Saut Waghi, Jamie Maxtone-Graham i winim luksave bilong Hailans Famas na Setlas Asosiesen long kamap patron o bikman bilong asosiesen na mausman bilong namba 50 anivesari selebren bilong ol.

Mista Maxtone-Graham i bin kisim askim bilong Presiden bilong Hailans Famas na Setlas Asosiesen (HFSA) Sinake Giregire, wanpela namba wan kopi plantesen na fektori bosman.

Mista Giregire i bin wanpela long ol namba wan man PNG long kamap memba long 1958 na em i bin namba wan man PNG long kisim luksave long kamap wanpela eksekutiv memba bilong asosiesen.

Mista Maxtone-Graham i wan-

bel long kamap mausman bilong Asosiesen na em i tok klia olsem papa bilong em Peter Maxtone-Graham yet i bin man husat i bin kamapim na raitim sata, mama lo na as tok bilong asosiesen we i bin kamap long 1956 long givim luksave long HFSA.

Mista Maxtone-Graham i tok olsem em i amamas long tok olsem sampela long ol bikpela eksekutiv memba em Jim Taylor, Jim Leahy, Ian Downs, Sir Roger Middleton, Keith Levy, Paddy Leahy, na ol arapela biknem fama insait long Hailans rijen.

HFSA i bin kamap long 1953 long hat wok bilong ol waitman fama long makim maus bilong ol i go long gavman na wanpela rot bilong ol long senisim ol tingting long strongim ol yet insait long

Hailans rijen.

Tasol taim graun i bin op long Goroka long 1955, planti ol distrik opisa na ol arapela manmeri i bin sanapim ol plantesen bilong ol. Bikpela lukluk i bin go long kopi na asosiesen i bin kamap long givim luksave long ol dispela samting.

Long 1956 HFSA i stat long lukluk ausait long Hailans rijen tasol na sanapim ol brens bilong ol long Madang, Wau/Bulolo na Finsafen insait long Morobe provins.

Mista Maxtone-Graham i tokaut olsem ol bai mekim Waghi Agrikalsa Festival na bihain Goroka Agrikalsa Festival bihain long dispela yia na long 2006 dispela tupela festival bai givim bikpela luksave long ol selebren.

Wollom belhat long NCDC

MEMBA bilong Mosbi Not Is insait long Nesenel Kapitel Distrik, Casper Wollom i autim belhat bilong em long ol Nesenel Kapitel Distrik Komisn (NCDC) i save ronim ol manmeri i maket aninit long infomel sekta lo.

Mista Wollom i tok ol inspekta bilong NCDC i wok long bagarapim nating ol manmeri insait long

Mosbi siti.

"Bilong wanem bai yu mas ronim ol maket manmeri olsem ol pik na dok taim ol i wok long hat wok long painim kaikai bilong ol famili bilong ol," Mista Wollom i askim.

Em i tok i gat mobeta rot bilong strongim Infomel Sekta Lo na raun painim ol manmeri i wok

long traim long mekim liklik mani bilong ol yet.

Mista Wollom i tok em i wanpela sem pasin tru long lukim ol man i werim yelo uniform i wok long ronim ol mama olsem ol bikpela raskol man, na em i salensim menesmen bilong NCDC long stretim gut wanpela plen bilong ol maket manmeri.



MAKIM NUPELA GOROKA: Goroka taun insait long lsten Hailans provins bai gat nupela plen bilong opim wok bisnis long bihain taim. Wanpela volantia man Australia Lloyd Nolan i bin givim sevis bilong em long mekim wanpela plen bilong Goroka taun na givim long lsten Hailans Gavana Malcolm Smith Kela na Etwaisari Komiti Sekreteriet Eksekutiv Opisa John Sari. Mista Smith i tok bai i gat wanpela komiti i sanap bilong glasim olgeta hap we Goroka i ken groim long bihain taim. Bikpela hap bilong dispela plen em bai lukluk long skelim graun namel long ol papa graun bai ol i ken kamap ol len lod o bosim wok bisnis antap long graun bilong ol.



Cat® 428D Backhoe Loader

Raising the standards for performance, versatility operator comfort.

More than a machine. A Partner.

The 428D benefits from increased hydraulic performance and operator comfort, whilst maintaining the high levels of visibility, durability and reliability that Caterpillar® Backhoe Loaders have long established in the industry.

- **Engine and Hydraulics** - The Caterpillar® 3054 turbocharged engine is designed for strength, performance and versatility. The load sensing, closed centre hydraulics system provides power where you need it, when you need it.
- **Operator Station** - Style, comfort, superb visibility and ease of operation maximise operator comfort and productivity.
- **Serviceability** - Excellent access and fewer maintenance requirements add up to unparalleled ease of service.

Hastings Deering



PORT MORESBY
Phone: 390 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAUL
Phone: 982 1244
Fax: 982 1129



Radio Australia
Tok Pisin News

Harim TOK PISIN long Radio Australia
101.9FM Port Moresby

Yu ken harim Radio Australia
long ol dispela Sot Wev Frikwensi
Tok Pisin Service
6am - 7am : 6080; 7240(KHZ)
7pm - 9pm : 5995; 6020; 9710; 1280(KHZ)

PASIFIK NA WOL NIUS

Yurop makim planti milien bilong ol suga fama

YUROPIEN Komisin i sanapim wanpela 65 milien dola skim bilong ol Afrika, Karibien na Pasifik kantri we ol i save salim suga bilong ol i go long Yuropien Yunion (EU). Aninit long Suga Protokol, 18-pela ACP kantri bai karim hevi bilong daunim bilong ol prais bilong suga long EU maket. Na maski 65 milien dola i pairap olsem bikpela mani tru, taim dispela mani i bruk go long wan wan long ol 18 kantri em i no inap. Olsem na hamas long dispela mani nau bai go long Pasifik?



Fiji suga indastri bai i mas kisim moa helpim.

Meri i askim: Myra Mortensen

Husat i givim bekim: Michael Gahler,

Vais Presiden, Dvelopmen Komiti bilong Yuropien Palamen.

GAHLER: Yes, em i samting wantaim planti suga yet i go kam, tasol palamen yet em mi harim olsem Yuropien Komisin i tok em i no inap, na em bilong stat bilong em tasol na dispela 40 milien Yuro em bilong 2006 tasol. Bikpela plen bilong nupela suga protocol bai go inap long 2013.

Tasol mipela i klia olsem sapos i go inap long 40 milien Euro tasol i go inap 2013 bai no inap.

Palamen i go moa long dispela komisin nau yet. Na palamen i tok olsem ol dispela hap mani bai dabol i go antap long helpim ol dispela kantri.

MORTENSEN: Dispela mani bai bruk i go olsem wanem?

GAHLER: I gat wan wan kwota o mani mak we ol 18-pela kantri i gat, olsem na bai i go het...Plen em long wan wan i go long ol kantri. I gat bikpela hap sapot we i ken kam long traim strong bilong suga we i mas go nabaut long ol wok binis ausait long suga sekta.

Ol dispela kantri bai kisim base helpim olsem wanpela bikpela rot tasol ol arapela program tu bai kisim mani long dispela rot.

Sapos yu lukluk long Fiji, suga sekta bilong em i ken senis long bihainim dispela nupela suga polisi, tasol i gat bikpela wok long senisim yet.

MORTENSEN: I mas i gat wanpela bikpela senis i kamap long Fiji, insait long bikpela suga indastri bilong ol, tasol yu soim olsem kontribusen bilong mani o makim bilong mani bai no inap go long suga indastri tasol, na bai go long sampela arapela hap?

GAHLER: Yes, sapos mipela i laik strongim moa yet, i ken go long stretim ol rot long wanem i gat hevi long Fiji long sait bilong rot i go long ol fektori o long ol fektori i go long ol bris bilong sip.

Olsem na em bai i mas senisim tu suga indastri.

Na ol i gat, mi save, las yia ol i gat moa long 500 tausen turis. Mi bilip olsem i gat rot bilong strongim turisim indastri tu long givim ol pipel ol arapela rot bilong mekim bisnis.

Tasol mi ting sapos mipela i lukluk long Fiji tasol, i gat sans olsem ol yet bai gat ol wan wan hevi olsem ol Melanesia papa graun na Indian suga produsa. I gat sampela hevi i stap.

MORTENSEN: Na ol mil tu i mas i gat wok strongim.

GAHLER: Yes, ol mil i mas kisim nupela wok strongim. Tasol long sait bilong mani, ol i ken yusim long givim mani long wanpela maket-

ing plen bilong Fiji ram o ol arapela samting ol i save mekim long suga.

MORTENSEN: Yu toktok long ol kwota - bai ol i skelim bihainim mak bilong kwota?

GAHLER: yes, mi tok mipela i gat klia tingting long mak Fiji i kisim pinis na bihainim dispela sais, bai mipela i givim mani long ol.

MORTENSEN: Na wanem taim bai dispela skim i go het?

GAHLER: Em bai kamap long mun Julai 2006, tasol i gat narapela tripela yia i stap yet pastaim long ol 39 pesen daunim bai kamap.

Olsem na i mobeta long stat nau na lukim i kamap gut long 2006 taim namba wan hap mani i ron, na em bai narapela samting gen. Mipela i lukluk long 2007 long kamapim narapela samting bilong developmen koporesen bilong EU bai ol dispela mani, bai dabol i go antap long helpim ol dispela kantri long wok bihainim gut.

MORTENSEN: Sapos em i dabol, bai 40 milien Euro bai go antap long 80 milien long namba tu yia?

GAHLER: Sapos em i stap long Palamen, yes, na komisin bai givim luksave olsem bai i mas go antap yet.

WOL NIUS:

Edward Natapei i lida blong Vanua'aku pati

BIPO Praim Minista bilong Vanuatu, Edward Natapei, i kamap nau olsem lida blong Vanua'aku pati em nau i kamap strong ken. Sean Dorney i bin ripot olsem nupela ol eksekutiv bilong pati em i bin bringim Vanuatu i go kisim independens, i luk olsem liklik lain blong Mista Natapei i bosim.

Long ol yia i go pinis, Vanua'aku pati i wanpela strongpela pati tru long Vanuatu. Long ol yia taim kantri i bin kisim independens long nupela taim, em i save sanap long em yet long gavaman we em i no nidim arapela ol pati long kamapim kolisin gavman.

Tasol, i bin bruk long sampela taim, we i bin mekim ol i kamapim sampela arapela ol pati.

Na nupela bruk blong pati i bin kamap tupela yia i go pinis bihain long kivung bilong pati, tasol wanpela long tupela hap blong pati i bin wok long tok ol i trupela pati.

Bihain long planti toktok na i go long kot, tupela sait i bin tok orait long holim nupela miting em ol i holim long Malakula ailan.

Ol lida blong tupela grup i bin holim wanpela wanbel seremoni long dispela wik we ol i givim ol pik long ol yet.

Na long taim blong vot blong makim presiden, bipo Praim Minista na nau Minista blong Pablik Utilities, Edward Natapei i bin winim Sela Molisa 124 vouts to 67.

Taim nogut long Amerika i kilim moa long 100 pipel pinis

Samting moa long 100 pipel ripot i tok ol i dai pinis long South blong Amerika long wanem long dispela bikpela ren na win tru long kamap long kantri.

Hurricane Katrina i bin kamapim bikpela ol bagarap tru long ol nambis taim em i ron i go olsem long Luisiana, Mississippi na Alabama.

Maria Yabrody blong America Red Cross i bin tok ol "imejensi wokman i bin stat long painim aut mak blong ol bagarap long ol eria em dispela storm i bin bagarapim.

RADIO TOK PISIN PROGRAM
TUNE IN: 101.9 FM

Radio Australia Tok Pisin Program - stat long mun Mas 2005

WANDE Moring	6AM Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Hettain na Program Priviu
7.15PM	Spots
7.30PM	Nius na Karen Afeas
8PM	Helt
8.15PM	Musik
8.30PM	NIUS
8.40PM	Spots Riplei
8.55PM	Musik
9PM	Stesen Pas
TUNDE Moring	6AM Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Hettain na Program Priviu
7.15PM	Musik na Chit-Chat
7.30PM	Nius na Karen Afeas
8PM	Mama Graun
8.15PM	Musik/Spots
8.30PM	NIUS
8.40PM	Helt Riplei
8.55PM	Musik
9PM	Stesen Pas
TRINDE Moring	6AM Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Hettain na Program Priviu
7.15PM	Musik na Chit-Chat
7.30PM	Nius na Karen Afeas
8PM	Focus
8.15PM	Musik/Spots
8.30PM	NIUS
8.40PM	Mama Graun Riplei
8.55PM	Musik
9PM	Stesen Pas
FONDE Moring	6AM Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Hettain na Program Priviu
7.15PM	Musik na Chit-Chat
7.30PM	Nius na Karen Afeas
8PM	Youth
8.15PM	Musik/Spots
8.30PM	NIUS
8.40PM	Focus Riplei
8.55PM	Musik
9PM	Stesen Pas
FRAIDE Moring	6AM Stesen Op - Nius Hettain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen op - Oi Nius Hettain/Program Priviu
7.05PM	Musik na Chit Chat
7.30PM	Nius
7.40PM	Wantok
8PM	Lokal Ben
8.30PM	Nius
8.40PM	Musik/Chit Chat
9PM	Stesen Pas
SANDE Nait	7PM Stesen op - Oi Nius Hettain/Program Priviu
7.05PM	Musik na Chit Chat
7.30PM	Nius
7.40PM	Femili Blong Serah (Radio Plei)
8PM	Lukluk Bek Long Wik
8.30PM	Nius
8.40PM	Musik/Chit Chat
9PM	Stesen Pas

TOKSAVE: YU KEN HARIM RADIO AUSTRALIA TOK INGLIS LONG 24 AUA 7 DE LONG WAN WIK.

Pacific BEAT

Listen to Radio Australia
101.9FM Port Moresby

4, 5, 6am & 4pm, 5pm
including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

RAGBI LIG

POT MOSBI SP RAGBI LIG

Fes Semi Fainol
PRL 1
Sarere Sept 03, 2005
09:00 Brothers vs Paga Panthers U17
10:00 Defence vs Royals U17
11:00 Hawks vs Paga Panthers U19
12:00 Royals vs Tarangau U19
1:00 Puma vs Paga Panthers Res
2:30 Kone Tigers vs West Res
4:00 Magani vs Paga Panthers A

Sande Sept 04, 2005
PRL 1
09:00 West vs Souths U17
10:00 Defence vs Waliya U19
11:00 Defence vs Hawks Res
12:30 Puma vs Royals A
2:00 Kone Tigers vs Brothers A
3:30 SPC Selek sait vs SP Jon Selek sait
MINOR PREMIERS
A Tarangau
Res Souths
U19 West
U17 Hawks

SOKA

POT MOSBI SOKA ASOSIESEN FAINOL

Sarere Sept 3, 2005
Bisini 1
08:00 Maset vs KG Utd D3-E/F
09:30 Mungkas vs Guria U21-E/F
10:40 Naniu vs LBC Defence W1-E/F
12:00 Cellnet vs Badili Utd D1-E/F
Bisini 2
08:00 Rapatona vs LBC Defence U21-E/F
09:30 Tarangau vs Telkom D2-E/F

10:40 University vs PS Rutz PR-E/F
12:00 University vs PNG Gardener WP-E/F
13:20 Rapatona vs South Utd Prem-E/F

Sande Sept 4, 2005
Bisini 1
08:00 M/Yarangs vs KB Utd D3-S/F
09:30 Bavaroko vs Badili Utd U21-S/F
10:40 Souths vs Los Negros W1-S/F
12:00 UBOG vs Verave D2-S/F
13:20 Naniu vs Mungkas D1-S/F
Bisini 2
08:00 University vs Cosmos U21-S/F
09:30 Winner E/F vs Tawala D2-S/F
10:40 Souths Utd vs LBC Defence PR-S/F
12:00 Telkom vs WMI WP-S/F
13:20 PS Rutz vs University Prem-S/R

ERIMA SPOT ASOSIESEN

Sarere Septemba 3
Man tas ragi
08:30 Silver Stones vs JS Warriors
09:20 Gateway Rabbitosh vs 21 Red Heads
10:10 Hillstone Spiders vs Gonix Reds
11:00 Taxi Base vs Katimo Panthers
11:50 Boom Gate Jets vs Megusa Crushers
12:40 Loose Pallets vs FTM Slaves
01:30 Border Panthers vs Neggie Dogs
02:20 Southern Sons vs 5 Mile Animals
03:10 Cinamex Blues vs 5 Mile Crushers

04:00 Swamp Eels vs Jiwaka Kongos
Meri soka
11:00 Loose Pallets vs FMT Slaves
11:50 Silver Stones vs JS Warriors
12:40 21 Red Heads vs Taxi Base
01:30 Boom Gate Jets vs Megusa Crushers
02:20 5 Mile Crushers vs 38 Specials

Sande Septemba 4
Man tas ragi
08:30 Hidden Red Crocks vs Moitaka cowboys
09:20 289 Top Street vs Gene Rocks
10:10 Sharp Rats vs Nane Tigers
11:00 Out cast Raiders vs Golf Spiders
11:50 Top Town Casino vs Mt Eagles
12:40 Maus Rot Knights vs Inner Circle Dragons
01:30 Wild Cts vs Junior Nomards
02:20 BO Hunters vs Observers
03:10 K Roosters vs Mad Dogs
04:00 Flames vs DYC Fire Safe
Meri soka
12:00 289 Top Street vs Nane Tigers
12:50 Sharp Rats vs Mt Eagles
01:40 BO Hunters vs Inner Circle Dragons
02:20 Kindino Sisters vs DYC Fire Safe

EVADAHANA SOKA ASOSIESEN 9-MAIL

Sarere Septemba 3, 2005
ESA 1
08:00 Graveside vs Batisalem meri
08:30 Batisalem vs Notna D3
09:20 Wopa Utd vs K-T Manduz D2
10:00 Natare vs Namagawi Res

10:40 Finka vs Texas meri
11:10 Raitopos vs Wasu Crabs D3
11:50 Liwale vs Kilengs Res
12:40 Country Roots vs Namagawi meri
13:20 AGM Roots vs Sapphire D2
14:00 Sulu vs Namis D1
14:40 Namagawi vs D-Rats D1
15:30 Gara Utd vs Junction D1

ESA 2
08:00 Outsiders vs Gala Konok D3
08:40 Gee Neps vs Natare meri
09:20 Nen Konok vs Brothers D2
10:00 Gaidi Utd vs K-Imindos meri
10:40 D-Rats vs Graveside Res
11:10 Namis vs Sulu Res
11:50 AGM Roots vs Simbai Utd meri
12:40 TKSS vs Wasu Crabs D2
13:20 Gala Konok vs Finka D1
14:00 Kilengs vs Graveside D1

Sande Septemba 4, 2005
ESA 1
08:00 Simbai Utd vs K-T Mahnduz D3
08:40 Wasu Crabs vs Kilengs meri
09:20 Nen Konok vs Country Roots D3
10:00 Natare vs Simbai Utd D2
10:40 Sapphire vs Brothers D3
11:10 Siale vs K-tt Mahnduz meri
11:50 BS Natives vs Texas Res
12:40 K-Imindos vs Outsiders D2
13:20 Siale vs Gaidi Utd Res
14:00 Gala Konok vs Finka Res
14:40 Gee Neps vs Natare D1
15:30 Liwale vs Texas D1

ESA 2
08:00 D-Rats vs Junction meri
08:40 Notna vs Batisalem D2
09:20 TKSS vs K-Imindos D3
10:00 Nen Konok vs Sapphire meri
10:40 Country Roots vs Raitopos D2
11:10 AGM Roots vs Wopa Utd D3
11:50 Notna vs Gara Utd meri

12:40 Gee Neps vs Gara Utd Res
13:20 Nalas vs Junction Res
14:00 Nalas vs Gaidi Utd D1
14:40 Siale vs BS Native D1

ORO VILES SOKA ASOSIESEN


Sarere Sept 03, 2005
07:30 Asumnaiyes vs Ehe Kombu MB
08:20 Ormilats vs Ottas meri
09:10 Tufi Fjords vs Pongoros MB
10:00 Tamata vs Ormilats MB
10:40 Hillside vs Zandas meri
11:20 Bokoro vs Saipex MB
12:10 Songe vs Diwune MB
13:00 Tamata vs Bokoro meri
13:50 Tufi Fjords vs Pongoros MA
14:40 Zandas vs Ottas MA
15:20 Papas vs Hillside MA
16:00 Bokoro vs Saipex MA

Sande Sept 04, 2005
08:00 Zandas vs Ottas MB
08:50 Beda vs Mambus MB
09:40 Musa vs Kumusi MB
10:30 Mambus vs Saipex meri
11:10 Papas vs Hillside MB
12:00 Asumnaiyes vs Songe meri
12:40 OVSA 2 vs Mt Obree 2 M
13:45 OVSA 1 vs Mt Obree 1 M

Sapos yu laik putim spot dro bilong yu long Wantok Niuspepa salim i kam long feks namba 325 2579 o salim long imel edres word@global.net.pg



BIKPELA BOI: Guria fulbek Menzie Yere i kisim su long PNGRFL deputi siaman Albert Veratau olsem presen bilong SP Kap pilaia em su biknem Australia pilaia Mal Meninga i givim long PNGRFL.



OLGETA SAMTING FLAI: Dispela Pot Mosbi netbol pilaia i no wari sapos olgeta samting i laik pilai.



WIN SOT: Bikpela Guria pilaia Lucas Solbat i takolim wanpela Bulldog pilaia long las Sande SP Kap gren fainol we Guria win long liklik mak 13-12.



LAIKIM YUPELA: Foren Minista Sir Rabbie Namaliu (namel) wantaim Is Nu Britan Gavana Leo Dion (han sut) i amamas wantaim ol Guria pilaia bihain long win bilong ol.




SORI TUMAS: Dispela Pot Mosbi ragbi yunion pilaia i salim skin long maus bilong sak.



GUTPELA TRU: Dispela meri i danis amamasim ol manmeri long bikpela pilai.




NOKEN TRAIM: Strongpela difens bilong Telsta gol kipa Jacklyn Niblet i lukim ol i winim Paramana 63-47 long Pot Mosbi netbol divison wan pilai las wiken.



YU INAP? PS United Ken Gule i no laik tru long Souths United pilaia i kisim bal long em long Pot Mosbi primia soka long Bisini soka graun las Sarere.



KIRAP DAS: University Piggies i stopim ol 2004 maina primia POM Harlyquins long go het long gren fainol narapela wik Sarere.



WET PASTAIM: Pilaia bilong Titans i lukluk raun na painim sapat long Exodus pilaia i putim han long stopim em.



HOLIM EM: Coronation Praimeri Skul ful bek, Robert Morere i sakim tupela difenda bilong Waigani Praimeri long anda 16 skul ragbi lig pilai long Murray Bareks las Sarere.



KISIM I KAM: Pilaia bilong University Bulldog na Mosbi i resis long kisim bal long wanpela gem bilong ol long dispela yia.

Ol poto: ANDREW MOLEN



NRL NIUS




"MIPELA NO PUNDAUN"- Strongpela Brisbane Broncos man Shane Webcke i tok Broncos i no pundaun bihain long sampela bipo klab pilaia husat i sutim tok long ol olsem ol pilaia i no pilai gut na dispela i lukim ol i lus long foapela pilai bilong ol i kam inap nau. Ol bipo pilaia olsem Greg Dowling, bipo kepten Gene Miles na hatman Trevor Gillmeister i tok ol pilaia bilong nau i no putim olgea tingting na strong bilong ol long pilai. "Tingting bilong ol em tingting bilong ol," Webcke i tok. "Mi no ting olsem. Mipela i no pundaun yet olsem ol i ting," em i tok.

I GAT LAK O NOGAT?: Boi nogut bilong Not Kwinnsen Cowboys Carl Webb husat i pilai long prop bai laki long abrusim sas em bai kisim long han bilong em em NRL Judiseri bihain long em i mekim wanpela takol South Sidni Adam MacDougall long las Sande bai laki o nogat. Sapos em i kisim sas dispela bai lukim em i no inap kamap long wanpela NRL pilai.



TAIM BILONG HELPIM: Ol pilaia bilong Canberra Raiders long dispela wik i mekim sampela gutpela wok bihain long ol i stretim skul bilong sampela ol turangu lain husat i gat han, lek nogut o husat i ai na yau pas. Ol i bin stretim Latham Pramerri Skul long Canberra.



NOGAT WARI: St George Illawarra Dragons kepten Trent Barrett i tok hevi bilong las wiken we i lukim em wantaim wan pilaia bilong em i mekim sampela samting bihain long ol i spak long wanpela hotel bai i no inap long bagarapim tingting bilong ol taim ol i bungim Newcastle Knights long dispela Sande. Hotel i sasim tupela long K4,000 na K2,000 wantaim. Long taim tupela i spat Barrett i rausim trausis bilong em na mekim pus ap wantaim pens bilong em bipo long ol manmeri.

EM ORAIT LONG LUS: Kiwi Tes pilaia na West Tigers winga Paul Whatuira i tok em orait long lus bihain long Tigers i go daun long Melbon Storm long wiken pilai bilong ol.

Em i tok dispela lus bilong ol i gutpela long wanem dispela i ken mekim ol i kirap na was gut long las NRL raun pilai wantaim ol Penrith Panthers long dispela wiken.

Em i tok pilai bilong ol Tigers bai strong moa bihain long kam bek bilong senta Shane Eford husat i bin kisim faiv wik malolo bihain long em i kisim bagarap long lek bilong em.

Whatuira husat i gat wankain namba bilong ol poin olsem John Wilson na Pat Richards long 16 poin i tok dispela lus bilong ol i mekim ol bai mas was gut long dispela wiken.

"Ol 'pikinini bilong Tigers' i bin dringim gut susu' long ol win bilong ol inap long las raun lus i mekim ol i mas sekim gut kem bilong ol," Whatuira i tok.


Nau yet Tigers i stap long namba foa ples wantaim 32 poin bihain long Parramatta Eels, St George Dragons na Brisbane Broncos husat i go pas wantaim 34 poin. "Mipela i laik redi gut," em i tok.



BRONCOS NO INAP: Long ol i winim Canberra Raiders 48-10 long las wik dispela inap tok klia long ol Broncos olsem ol Parramatta i no inap surik long ol.

Kosa Brian Smith i tok em i gat inap strong long daunim ol Broncos wantaim yangpela sait bilong em. Ol yangpela pilaia olsem ful bek Joel Reddy, senta Brett Delaney na winga John Williams na lok Luke O'Dwyer inap brukim stopim atek bilong Broncos na brukim difens bilong ol.

Smith i mekim ol sapota i kirap nogut taim em i singautim gen senta Timana Tahu na bek rowa Glenn Morrison husat tupela i stap malolo long bagarap long han long kam bek long dispela pilai long wiken. Tasol Wade McKinnon bai kam bek tu long kisim ples bilong em long ful bek na Reddy bai sindaun long bens. Narapela pilaia husat i kam bek em winga Eric Grothe.



Raun 26

Fraide, Septemba 2- Broncos vs Eels. Yu ken lukim long EMTV long 8.30 long nait.

**Sarere, Septemba 3 - Storm vs Cowboys
Rabbitohs vs Sharks
Sea Eagles vs Raiders**

Sande, Septemba 4 - Dragons vs Knights. Yu ken lukim dispela long EM TV long 4:00-6:00 av'-nun.

**Roosters vs Bulldogs
Tigers vs Panthers**

Bal: Warriors

NRL Poin Lata (after rnd 15)

Klab	P	W	D	L	B	P/D	Pts
1. Eels	23	15	0	8	2	234	34
2. Dragons	23	15	0	8	2	137	34
3. Broncos	23	15	0	8	2	127	34
4. West Tigers	23	14	0	9	2	117	32
5. Storms	23	13	0	10	2	184	30
6. Cowboys	23	13	0	10	2	170	30
7. Sharks	23	12	0	11	2	-10	28
8. Sea Eagles	23	11	0	12	2	-96	26
9. Panthers	23	10	0	13	2	-16	24
10. Roosters	23	10	0	13	2	-19	24
11. Bulldogs	23	9	1	13	2	-178	23
12. Warriors	24	10	0	14	2	-13	22
13. Raiders	23	9	0	14	2	-123	22
14. Rabbitohs	23	8	1	14	2	-222	21
15. Knights	23	8	0	15	2	-192	20

* P: Pilai, W: Win, D: Dro, L: Lus, B: Bye, P/D: Poin Diferens, PTS: Poin

Top 10 poin skora

Pilai	Tim	Poin
1. Brett Hodgson	Sharks	244
2. Luke Burt	Eels	184
3. Preston Campbell	Panthers	180
4. Hazem El Masri	Bulldogs	180
5. Luke Covell	Sharks	174
6. Matt Orford	Storms	158
7. Stacey Jones	Warriors	147
8. Clinton Schifcoske	Raiders	136
9. Michael Witt	Sea Eagles	136
10. Darren Lockyer	Broncos	133



BULLDOG NOGAT: Sidnit Siti Roosters namba wan winga Craig Wing i tok Bulldog i no inap long stopim ol long win taim ol i bung long laspela raun bilong NRL long dispela wiken. Nau yet Roosters i gat 24 poin we ol i stap wanpela poin antap tasol long Bulldog. Roosters i stap long 10 ples.

Guria kisim bek kap

Andrew Molen i raitim

TAIM askim i go long kepten bilong Agmark Rabaul Guria, Michael Marum long wanem samting tru bai winim gem bilong ol em i tok; "Difens bilong mipela tasol bai winim gem."

Tru tumas long toktok bilong Marum, ol Guria i no givim sans long ol Brian Bell Pot Mosbi Bulldogs we i lukim ol i kisim bek taitol bilong ol wantaim 13-12 skoa long Pot Mosbi las Sande.

Ol 'Dogs i kamap long trai lain bilong ol Guria planti taim na planti taim tu ol i luk olsem bai ol i skoa tasol difens bilong ol manki Is Niu Briten i strong tumas.

Wanpela rong bilong ol Bulldogs tu em ol i no holim bal gut na dispela i no helpim gem bilong ol.

Kepten na faiv-eit bilong Bulldogs Steve Hondina i tok planti pilaia long tim em ol nupela manki na dispela yia em i fes taim bilong ol insait long SP kap na moa long en long gren fainol bilong dispela bikpela gem.

Ol Guria long narapela sait i gat planti pilaia husat i smelim SP kap bipo na husat ol i bin winim kap tupela yia i go pinis bipo long gem i malolo.

"Mipela i wokhat long stat bilong yia yet i kam kamap long gren fainol na bai mipela i wok strong yet," Hondina i tok.

Tasol sapos yu ting Bulldogs bai i pinis nau, yu i ken tingting ken bilong wanem ol Bulldogs bai i kam bek strong moa yet neks yia we bai i lukim ol i traim ken long kisim kap long ol sempion bilong dispela yia.

"Neks yia bai mipela i kam ken na yupela i ken traim long planim mipela ken long matmat bilong yupela long Kokopo," Hondina i tok long ol Guria.

Marum i tok amamas tu long fom o wei bilong pilai bilong ol pilaia bilong em.

"Mi ting ol manki i kisim fom long rait taim stret we fainol i kamap na dispela i helpim ron bilong mipela," em i tok.

Tupela kepten wantaim i kamapim gutpela na strongpela gem bilong tim bilong



WIN: Ol manki tobaras i amamas na singsing bihain long ol i difenim Kap long winim Bulldog 13-12 long wanpela strongpela gren fainol pilai las Sande. Sanap holim kap em (l-r) Menzie Yere, Michael Marum na Lucas Solbat.

ol we i lukim skoa i no bikpela na win bilong Guria em long wanpela poin tasol taim win i karim kik bilong Hondina i go long sait.

Fes hap i lukim Hondina yet i skoaim ol poin bilong Bulldogs wantaim wanpela penolti kik, bihain trai long wanpela insep we em i kisim bal na ron long 40 mita mak long skoa aninit long pos.

Dispela i lukim skoa bilong ol i go antap long 8-0.

Huka bilong Guria, Opisa Pomba i bekim long hapsait we i lukim em i karim Bulldog hap Geno Kima na senta Charlie Wabo i go antap long trai lain na skoa, wantaim kik bilong Jessie Alunga long kisim ol i go 8-6 long hap taim.

Ol poin i no kam hariap long seken hap na wanpela penolti kik bilong Guria i levelim skoa 8-8.

Gem i ron longpela taim bipo long traipela fowet bilong Guria, Lucas Solbat i kisim wanpela lus pas na ron i go insait long gep na silip long trai lain tasol lek bilong Alunga i krangki na skoa i stap 12-8.

Alunga i bekim mis bilong em wantaim wanpela fil go long namba 35 minit long putim ol 13-8 tasol gem i no pinis yet na ol Bulldogs i mekim ol Guria i kirap nogut long las minit.

Long ful taim stret Bulldogs winga Abraham Yobale i skoa long kona long putim ol 12-13 na ol i lukluk tasol long kik bilong kepten, Hondina sapos em bai inap long sevim laip bilong ol na brukim lewa bilong ol Guria tasol strong bilong win i kisim bal i go longwe long namel bilong tupela pos.

Dispela i lukim Guria win 13-12.



GIVIM GUT! GG Sir Paulias Matane i kik ov long gren fainol pilai. Sanap lukluk em referi Bill Harrigan na PNGRFL siaman Sir Bob Sinclair.



TRU YET: Planti manmeri i bin amamas long lukim ol meri Bogenvil i samsam (danis) long statim gren fainol.

Makim Praim Minista 13 sait

Paul Zuvani i raitim

OL SELEKTA bilong Papua Niugini Ragbi Futbol Lig bai kamapim wanpela pilai namel long ol pilaia bilong ol SP Kap tim na ol pilaia bilong Nesenel Jon tim long Pot Mosbi long dispela Sande.

Siaman bilong PNGRFL seleting komiti Arnold Krewanty i tok ol i abrusim ol pilaia bilong Rabaul Agmark Guria na Pot Mosbi Brian Bell Bulldog husat i stap pinis long Praim Minista 13 bai i no inap traim gen. Tasol ol pilaia husat

i no stap insait bai kisim dispela taim long soim strong bilong ol gen long go insait long Praim Minista 13 sait.

Em i tok long hevi long baim tiket ol i makim planti ol pilaia bilong Pot Mosbi long stap long dispela tupela sait.

SP Kap selekt sait em Charlie Pomba, Johnson Kuike, Leonard Otmar, Aaron Mulunga (Brian Bell Bulldog), Romalus Mago, Eki Ene, Leroy Muriki, Bafinu Ilai, Kawage Gagma (Monier Broncos), Randal Kaupa,

John Milba (LBC Bombers), Ganet Auwo (Coca Cola Lahanis), Francis Ray, Rodney Pora, Benny Pamba (Chemica Cowboys), Nathan Anjo (Toyota Mioks) na Terry Toa (Mabey & Johnson Muruks). Ol opisel em kosa Ivan Ravu, trena Ulea Rolu na menesa Johnnie Liti.

Nesenel Jon sait: Burau Burau, Lama Lion, Richard Polly, Nene Moide, David Puguma, Yaka Kapa, Richard Sinemau-kepten, Simon Tonge, Suckling Danega,

Freddie Kuman, Jessie Joe, Justin Soki (Sauten Jon), Wesley Totori, Gideon Asimaba (Ailan Jon), Peter Leon (Hailans) na Mark Warua (Noten Jon). Ol opisel em kosa Dr James Naipao, trena Phillip Boge na menesa Johnnie Liti. Long kamapim Praim Minista 13 sait we bai pilaim Australia selek sait long Pot Mosbi long Septemba 30 PNGRFL siaman Sir Bob Sinclair tok em bilong amamasim PNG 30 Independens aniveseri.

Kalabus kisim gutpela helpim

... i kam long pes 32

"19-pela kalabus bai i kisim ol samting na mi amamas long Lo na Jastis sekta long kamapim dispela ol program long ol kalabus."

"CS i afiliet long PNGSF olsem na wanem kos bilong spots i kamap bai CS i stap insait tu," em i tok.

"Mipela i redi tu long helpim wantaim sampela moni long ronim ol program.

Em i tok tenk yu tu long Brian Bell kampani husat i wanpela sponsa bilong PNGSF long longpela taim na tu ol arapela ogenaisesen.


Papa bilong Brian Bell kampani, Sir Brian Bell husat tu i bin i stap long presentim dispela ol samting i tok amamas long helpim bilong kampani bilong em i givim long ol kalabus lain.

"Mi ting em i gutpela tingting long kirapim spot bilong ol lain long kalabus bilong wanem em inap helpim ol long planti kain we.

"Mi laikim tu bai dispela kain ol spots program i mas kamap long ol skul we planti ol yangpela i ken pilai spot na stap longwe long bikhet pasin na ol bai i no i nap kamap long kalabus," Sir Brian i tok. Spots i no gutpela long helpim ol kalabus tasol em i save helpim wok bilong ol CS opisa tu.

"Taim mipela i toktok nating, wok i save hat liklik tasol long spots mipela i lukim olsem planti kalabus i save harim tok na dispela i mekim wok bilong mipela i isi.

"Mi laik tok tenk yu long Sir Brian na kampani bilong em long helpim mipela long dispela ol samting," asisten komisina bilong welfea na developmen, Solomon Kai i tok.



MAMA! Guria Jessie Alunga i laik pinisim win bilong Bulldog pilaia.



MAK TAIM: PNG arni i no dai ol i stap yet olsem ol tu i bin kamap na soim strong bilong ol.



HEY, HEY, HEY: Kain danis bilong ol Manus i save mekim ol manmeri i no save sindaun gut.

Kavieng holim neseneel basketball sempionsip

Andrew Molen i raitim

KAVIENG taun long Nu Ailan provins i redi nau long holim 2005 "All Stars" Neseneel Basketball sempionsips long Independens wiken.

Ol opisel na ol wokman i wok long wok hat long stretim ol kot na ol ples bilong pilai long Neseneel Fiseri Kolis, Taun, Utu Hai Skul na Peter Torot Senta.

Na dispela i kirapim bel bilong ol lain i stap long ol klostu ples na ailan long lukim dispela tonamen we ol i no lukim sampela yia nau.

Ol tim husat i givim nem pinis long stap insait long dispela sempionsip em Goroka, CBL (Pot Mosbi), Rabaul, Madang, Mt Hagen na Lae.

Singaut i go long ol narapela senta long givim nem bilong ol hariap bai ol i ken stretim ol samting hariap na inap long namba bilong ol lain husait bai i kam.

Kavieng Asosiesen we bai go pas long holim ol pilai wantaim Lahir Mining Basketball Asosiesen (LMBA) bai bung wantaim na lukautim dispela ol pilai.


Kavieng basketball asosiesen na LMBA em tupela tim tasol long dispela hap long kam long 2004 sempionsips long Pot Mosbi.

"Mi i laik kisim planti tim i kam raun long Nu Ailan na save long sampela trupela pasin na wei bilong ol Nu Ailan na long wankain taim amamasim 30 yia Independens bilong kantri wantaim pilai, sapot na bung wantaim ol narapela na moa yet bungim ol nupela poromanmeri long bungim PNG wantaim," mausman bilong tonamen Patu Lee Kotoveke i tok.

Olgeta tim i laik i go pilai i mas ringim ogenaizing tim long telefon namba 984 2362 (Kotoveke) o 984 2489. (Sophie Pilak) long save moa na tu givim nem long pilai.

Registresen fi bilong wanwan tim em K250 na dispela i ken i go insait long Wespac benk akaun long Kavieng namba 6000 663832.

Nem bilong dispela akatun em "Kavieng



KLIA: Chariots pilai i tok taim em i laik ronawe long Saints pilai long CBL pilai i no longtaim i go pinis long Hohol Kot.

Amateur Basketball Association" na taim bilong baim fi long pas em Mande Ogas 29.

Long wankain taim Neseneel Basketball Federesen presiden Giamsa Yagas i tok ol asosiesen we i afiliet long mama bodi we em i federesen bai go long dispela ol pilai.

"Planti ol arapela asosiesen i no baim afili-iesen fi bilong ol. Ol asosiesen we i afiliet wantaim federesen em CBL, Is Nu Britan, Mdang, Tari, Mt Hagen, Alotau na Kavieng," Yagas i tok. Em i tok Lae i wok long tok long baim fi bilong ol tasol ol i no baim yet.

CBL na Lae asosiesen em Yagas i tok ol i bikpela asosiesen olsem na fi bilong ol i stap olsem K1,000 na ol arapela asosiesen em fi

bilong ol i stap long K500. Long go pilai long dispela neseneel sempionsip Yagas i tok nominesen fi em K350.

Bihainim askim bilong lokel ogenaizing komiti presiden i askim ol asosiesen husat i bai laik kamap long ol pilai i mas tokaut kwik long tingting bilong ol na long wanem wei ol bai go.

"Sapos ol bai go long sip ol i mas toksave. Dispela i wankain long ol tim husat bai go long balus," Yagas i tok.


Long ol asosiesen husat i tok long go Pot Mosbi na Lae bai salim tupela tim na Madang, Rabaul, Kavieng, Goroka na Mt Hagen bai salim wanpela tim bilong ol man na meri. Em i tok Tabubil i no tokaut long tingting bilong ol.

Hap hap nius

United memeim Rock long Gerehu soka

LAS wik Gerehu Kantri Soka Asosiesen i amamas long lukim gutpela pilai namel long Dee Six United na Hard Rock we United i strong moa na win 1-0. United em ol manki Buang, Morobe provins na Hard Rock i manki bilong Kerema, Sepik na Morobe. Long 15 minit i go insait long fes hap straika Toni Isaac i salim wanpela gutpela bal i go insait long umben bilong Hard Rock bihain long sampela gutpela bol wok. Bal i stat long beks we ol midfila i kisim na bihain givim long Selwin Rodney we em i setim Isaac long kikim i go insait. Dispela gol i stap olsem inap pilai i pinis. Tru namel long dispela taim Hard Rock i bin kisim sampela gutpela sans long bekim tasol mak em ol i sutim i no bin go stret. Moa yet difens bilong ol manki Buang i strong tumas. Ol United tu i bin gat sans tu long skoa tasol han bilong Hard Rock gol kipa i olsem wanpela magnet we ol i no inap long abrusim em. Dispela i lukim tupela tim wantaim i no inap long skoa bihain long United i putim wanpela gol bilong ol tasol inap taim i pinis. Kosa bilong United Billy Lisek i tokim Wantok Spot olsem ol manki bilong em inap long putim sampela moa gol tasol long hevi olgeta i no bin kamap na dispela i lukim ol i sot long strong bilong skoa gen.

15 tokaut long PNG Neseneel Gems



EM KAMAP: Toea Wisil

FIFTIN provins i tokaut long kamap long PNG Neseneel Gem long Goroka long Novemba 13 i go inap long 19 bihain long dispea yia. Milne Be, Westen, Is Sepik, Sandaun na Not Solomon i no tokaut long tingting bilong ol, Gems iven menesa Peter Aglua i tok. Em i tok ol provins we i no tokaut long tingting bilong ol i mas tokaut hariap bai ol i ken redim ol samting bipo long taim i kamap. Na long ol spot ol provins bai kamapa long 13-pela pilai. Dispela ol pilai em wetlifting, netbol, soka, hoki, dat, ragbi yunion, basketbol, volibol, etletik, tas ragbi, boksing, ragbi 9s na bodibilding. Long namba wan PNG Neseneel Gem we pastaim ol i kolim "Provinsol" Gem i bin kamap long Goroka yet long Oktoba 2003 we Goroka yet kamap namba wan na winim 25 gol medol. PNG Neseneel Gem we ol ogenaisa i kamapim na i luk olsem Olimpik Gem bilong ol Gras Rut i bikpela samting long ol lain manmeri husat i gat gutpela save na strong bilong pilai tasol i no gat sans long makim kantri bai kisim dispela taim long soim ol yet. Wanpela bilong ol dispela ol manmeri em PNG 200m na 400m rana Toea Wisil bilong Mt Hagen.

Kingal seketeri bilong kikboksing

Andrew Molen i raitim

PAPUA Niugini kikboksing asosiesen long las wik i makim wanpela man long lukautim ol wok bilong asosiesen na tu lukautim olgeta kikboksing skul insait long kantri.

Dairekta bilong asosiesen na sempion kikboksia Stanley Nandex i tokaut long tingting bilong asosiesen we i lukim ol i makim Rex Kingal olsem jenerol seketeri bilong asosiesen.

"Mipela i painim wanpela man husat bai i stap na lukautim ron bilong ol samting long PNGKBA opis na Rex em i raitman bilong mekim dispela wok," Nandex i tok.

Em i tok wok bilong jenerol seketeri em long was long olgeta kikboksing skul insait long kantri na nem bilong ol paitmanmeri husat ol i

rejista wantaim asosiesen.

"Mi amamas long dispela nupela wok bilong mi na mi laik tok tenk yu long PNGKBA na KB1 long bilip long mi na kisim mi long dispela wok," Kingal i tok.

Em i tok em bai wokbung wantaim ol memba bilong asosiesen na ol klab na ol wanwan eksekutiv bilong ol long lukim olsem PNGKBA i kamap wanpela bikpela na gutpela asosiesen.

Kingal bilong Westen Hailens provins i no nupela long kikboksing, em i wanpela neseneel sempion husat i gat intenesenol eksperiens long pait olsem na ol lo, sistem na ol araepal wei bilong kikboksing we em i save pinis.

Long wankain taim Kingal i tok em i wok long mekim intanet pes bilong PNGKBA we bai i

helpim ol long salim ol sinia paitman bilong ol long narapela kantri.

"Taim dispela pes i pinis bai mipela i kisim olgeta toktok bilong yupela na putim insait long em bai ol promotu long ovasis i ken lukim na sapos ol i gat laik long kisim yupela i go pait bai ol i ken toksave long PNGKBA," Kingal i tok.

Nandex i tok ol i gat gutpela save long ol narapela asosiesen long ol narapela kantri na dispela intanet pes taim i redi bai i strongim dispela wokbung namel long PNG na ol. Dispela tu bai promotim spot.

"Dispela bai i givim sans long promotim ol sinia paitman bilong yumi long PNG long kisim intenesenol eksperiens long pait," Nandex. Em i tok taim dispela pes i redi bai em i toksave long lonsing bilong em.

63 manmeri kamap long Trukai spot progrem

Paul Zuvani i raitim

INAP olsem 63 spotmanmeri i kamap long wanpela Papua Niugini Spot Komisen Trukai Spot progrem long Kerema, Galf provins long lainim wok bilong spot administreta, kosa, referi na Fes Eid.

Long 63 lain husat i kamap 50 em ol man na 13 em ol meri. Ol i kam long ol distrik olsem Ihu, Kerema na Malalaua.

Na insait long ol kos ol i lainim ol gutpela pasin bilong kamap lida, kamapim gutpela oda bilong klab,

we bilong holim na ronim ol opis, lukautim na kamapim rekod bilong mani na kamapim na ronim ol pilai.

Progrem menesa Scott Vavine i tok em i amamas long kamap bilong dispela ol manmeri na i tok planti i soim laik bilong lainim ol samting em ol i skulim long ol.

"Kamap bilong dispela ol manmeri i soim wanpela samting- em long hangre ol i gat long lainim nupela ol samting long kamapim na lukautim pilai bilong ol," Vavine i tok. Long taim em i skulim ol

Vavine i tok ol i no ken lukim spot olsem em i samting bilong amamas tasol. Nogat. "Yupela i mas lukim spot long bikpela piksa. Yusim spot long kamapim gutpela komyuniti bilong yupela," em i tok.

"Spot i mas kamapim ol gutpela samting olsem ol arapela gutpela sosel pasin we i save helpim ol manmeri long gutpela tingting, pasin na sindaun long komyuniti.

Dispela progrem em i namba tu progrem bilong wanwan ol rijon we namba wan ol i holim long Wabag, Enga provins long ol spot

manmeri bilong Hailans rijon. Nau yet 99 manmeri i bin kam aninit long dispela progrem we 17-pela bilong dispela ol lain em ol meri na 82 em ol man.

Trukai i stat long sponsoaim dispela long 1995 na dispela em 10-pela yia olgeta long Industri i sponsoaim.

PNG Spot Komisen Sauten rijon spot kodineta Kila Dick i helpim Vavine long ronim progrem i sapotim toktok bilong Vavine na i tok ol manmeri i mas yusim spot long helpim ol yet.

**LAE
BISCUIT CO.**



SPOTS


**LAE
BISCUIT CO.**



NRL
Pes 29



Guria i
papa
bilang SP
Kap
Pes 30



**Nesenel
Basketbol
sempionsip-
Kavieng
Pes 31**

Andrew Molen i ratim

SPOTS bilong ol kalabus insait long kantri i kisim helpim i kam long Brian Bell kampani long strongim ol progrem bilong ol. Kampani i givim planti ol samting bilong spots we mani mak bilong dispela ol samting i stap olsem long K 40 000.

"Brian Bell kampani i amamas long wokbung wantaim Koreksenol Sevis (CS) bilong Papua Niugini na mipela i laik givim ol dispela gutpela spots samting long ol," Spot opisa bilong Brian Bell Wayne Satchell i tok long taim bilong givim dispela ol samting i go long CIS long las wik. Em i tok ol spots progrem we Brian Bell Kampani bai stat wantaim em soka, basketbol, volibol na tas ragbi.

Kampani i givim ol bal, uniform, wisel, pam na ol arapela samting i go long CIS opisa las wik.

"Ol dispela samting bai i ken mekim ol i amamas na kamapim tingting long ol," Satchell i tok.

Em i tok long stat ol i lukluk tasol long NCD tasol bihain taim ol bai go long olgeta arapela kalabus long kantri.

Em i tok Brian Bell i laik givim dispela ol samting ol kalabus long lukim ol kalabus lain i amamas tu long 30 yia Independens bilong kantri.

Ol kalabus em- Bomana, Biru, Gilligili, Daru, Buimo, Beon, Boram, Vanimo, Kerevat Kavieng, Lakiemata, Manus, Trening Kolis, Buka, Bihute, Baisu, Barawagi, Bundaira na Buiebi.

Seketeri Jenerol bilong PNG Spot Federesen Sir John Dawanincura husat tu i kamap i tok:

I go moa long pes 30...

Amamasim CIS




EM YA, KISIM: Sir Brian Bell husat i save helpim komyuniti long planti ol gutpela wok nau i laik statim wanpela spot progrem wantaim ol kalabus long kantri. Long hia em i givim ol bal i go long Solomon Kai, Asisten Komisina, Sosel Welfea na Komyuniti Developmen long Koreksinol Sevis. Lukluk em PNGSF seketeri jenerol Sir John Dawanincura (lep han) na wanpela CIS opisa.

TOYOTA

Limited Stock

CAMRY
Top Executive Class



2.4 litre, Twin Cam Multi Valve engine
Automatic Transmission
Fully packed with luxury features

FOR ENQUIRIES CONTACT
PH 3229400
Email : mhim@elamotors.com.pg

Ela Motors
TOYOTA TRADING (PNG) LTD.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.